

MWENE OOKHOOTTIWA



. . . wa ovuwa w'Apwiya oruuhiwa wa hiyo olelo mwaha wa olaleeriwa wa Masu. Nto eyo emosa. . .

² Esumana ela evinre, yaakhala ntoko nkiisoona sana. Kahi vekeekhai ohimya wira nkiisoona sana; waari owehawehiwa waatthunaneya wiiriwa, owehawehiwa mw'erutthuni. Nto ti yeeyo mwaiwaly'anyu, wira kaari oxipiritaali. Yaari mwaha wo wira kaaronwe wu wira kihikhale kirwaaka kirowaka kilapuwaka muro. Ninwehawehiwa nipwiipwi ninthotiha yolya n'osulu, ni nipwiipwi ninthotiha yolya na vathi. Ni awo ahaana o, mwa khula minuutu vakhani, awo ahaana otthika okumiha-tho raayo x. Masi nihaana owehawehiwa mw'erutthuni, naavaraka miteko ilapo s'okhopela, khula miyeeri mithanu na mosa. Munna Roberts n'akina, kinoona wira, anniwehawehiwa mw'erutthuni mwaya khula miyeeri mithanu na mosa. Masi miyo kaahivira miyaakha mixexe kiihiiriwe hata omosa.

³ Mulattu aya, okhala wira khankisivela makhura ale a ikhura, eyo ti etthu ene tu. Ni anihimya wira khiyaavo hat'etthu ekina akhalans'aya oovahaka, wa yeeyo, tivo miyo, oh, nkiisoonale sana okathi ovahiwa'aka etthu ene yeeyo. Nyuwo moosuwela, kihooleelani, mwa wahala a makhalelo aka, moota etthu iyo enikikhali'aya oohiisoona sana. Ni—ni miyo okinanara owurya etthu iyo. Ni miyo kaahimuleela mpatthan'aka ooreera murima tothoro, vakhala wi. . . “Khekhanle etthu ekina?”

Nto owo khwira, “Kinoona wira nnari, Munna Branham.”

⁴ Oh, okathi muhan'ole ovolonw'awe mme ni yeeyo, yaakhala wira, khino miyo kinootepiha, masi, imililituru imiya thanu na xexe. Eyo—eyo yaari. . . Miyo nkinatoko wona yoowaatta siiso. Nto kinivarela ephul'aka paahi n'ukeetta murima. Masi vookiserya kaahiwerya omirya.

⁵ Masi vano, mwa weereriwa wothe, ni sothene kivinry'akamo, kintthuna kaaxukhuru Apwiya mwaha wa owehawehiwa mw'erutthuni woolikana. Kiroovira, ipursento emiya, kinoowerya orowa nipuro pi nipuro mulaponi kintthun'aka orowa. Kaahaakoha matothoro, yaari araru w'aratti oomalela, yaawo, wo—woona waka, oLouisville. Nto kaahaakoha, miyo kiirale, “Kookhala oohiloka ipursento muloko mano?”

⁶ Khwira, “Khamurina hata nlepa noohiloka.” Khwira—khwira, “Muri mw'ekumi voomalela, mwa khula enamuna.” Nto nkireere omuxukhuru Muluku. Ti wa pani tho yaakhanly'aya ookhumaka woohikhala wa Tith'ihu a Wirimu, moone, okhala siiso?

⁷ Nto owo khwira, “Yawinyu. . . Sookhumela sanyu sothene sinnooniherya, mmo, wira mwa mmiravo.” Owo khwira,

“Trukuruku s’ephome anyu hata khasinapacerye ohononeya, wala etthu p’itthu.” Owo khwira, “Muri ni mukhalelo wooreera sana, Munna Branham.”

Nto miyo khwira, “Ahe, kinnitthapela sana.”

⁸ Vano kaahikhalana mureerelo w’olavula, w’okhalela onamoono ni khula nfurumeera exipiritaali ile, ni khula tothoro, wa Omwene wa Muluku. Vano tothoro mmosa, kinoona wira ohaana okhala vaava voosiis’ula. Nto miyo—miyo kinoo...miyo kinnitteeliwa murima osuwelaka wira nlelo aakhala atthu ooreera murima mulaponi mu, atthu eekeekhai, atthu akiwehawenhe mw’erutthuni, mahiku mathanu, khino yaarowa otthuneya itoolare imiya piili wala tthaaru wa khula emosa. Okathi ophin’ye aka omakiseryoni, awo khwiirasa, “Iwo p’ukhaviherya wahu muteko w’Apwiya, munivar’anyu.” Munnona? Ayo. Hata nnakhala...Khwira, “Vano, munoonuulihaha muru, hata onikohaka sinto ninoolokihani.” Khwira, “Mavekelo anyu paahi wa hiyo!”

⁹ “Nto muhina,” khwira wira, “nniphwanya etthu emosa yoowiiniha murima ehinwery’ahu osuwela sana.” Nto miyo khwira... “Hiyo...Eyo—khenikhala wira ti yeeyo...” Owo khwira, “Ota, nyuwo khamuhiyo oonanariwa wala oowuukhuwa. Masi,” khwira, “muhina, yookhala etthu yoothanana hiyo ehinwery’ahu osuwela sana.”

¹⁰ Miyo khwira, “Mwakilaathiru va okathi vakhani paahi, miyo kinimooleelani.” Vano miyo khupacerya olavula mwaha wa sowoona. Owo waari mpantte mukina wa awo. Awo khiyaasuwelasa hat’etthu ya yeeyo. Miyo khwaahimeerya Bibilia. Vano khwaahimeerya yoowoona Apwiya yaakivahaly’aya nihiku nlo, nto awo khunlasa ntoko anamwane. Khukilaathi vale paahi khunla. Nto miyo...awo... Miyo khwira, “Kinroromela wira khamunikuupuwelela ntoko natiini ootikiniha wala etthu siiso.”

¹¹ Khwira, “Hata vakhani, Munna Branham. Miyo kinnaamini iyo ni murim’aka wothene.” Owo khwira, “Masi kintthuna kihimye etthu emosa paahi. Khivanroiwa oxikola wiixutta ithu iya.” Khwira, “Kookupali wira sinikhuma wa Muluku Oowerya sothene.” Nto awo yaari araru wa matothoro oohimaxiwa oLouisville, oosuwelexa awo yaarin’aya. Nto, vano, miyo nkaareere otteeliwa murima mwaha wa yeeyo, ni osuwela wira khino Apwiya arookihya waala epyo iwe.

¹² Khula nfurumeera, kaahilavula ni yaawo. Awo, voosiisu umosa, kikhumaka musaala wa raayo x, khimuleela e... Kaahimuweha muthiyana mmosa mutokweene oomoriha ikharari. Owo khareere owereiwa. Vano miyo khurora kimwaattamelaka, kimwaattamelaka mpakha omuphiyerya. Koono wira khino aamookhwa. Nto miyo khwira, “Kintthuna kookoheni etthu, munna.”

Owo khwira, “Ayo, mulopwana.”

Miyo khwira, “Nyuwo mwa muKristu?”

Nto owo khwira, “Kiniira mpantta wa ekereja *khata*.”

¹³ Nto miyo khwira, “Kintthuna kikhalihe yoowiiweyaxa vakhani.” Miyo khwira, “Miyo—miyo kintthuna kisuwele mwaari muKristu, muKristu eekeekhai. Wira, mwavira vale ephareya ela y’ekumi, murowaka Elapo ekina, nyuwo munnimphenta Yoowo?” Miyo khwira, “Veekeekhai mwaamopowa?”

Nto owo khwira, “Ayo, mulopwana. Kaamopowa.”

¹⁴ Nto miyo khwira, “Muluku oreerihe murim’anyu nto. Hata wira ittheke sinvekhulela epanthe xeeni, munookhala sana weso, mwaarowakaru siiso.”

¹⁵ Vano neettaka iwo, nlelo aakhala athu anci-ene ahanle ooreera murima mulaponi.

¹⁶ Vano, olelo, kirwiiye ni yoowoona emosa enrow’aka wootharihelani ohoolo vahilekenle. Nto kaatthuna kilavule, toko, vakhani mwaha wa Masu, ’okhala wira kookupali wira Masu t’otthuneyexa, ootthuneyexa vano. Ni kinnitthapa omoona Charlie Cox, ni, munna, mpatthani aka yeemelanese vale, vamosa. Munna, nkinwerya wuupuwela . . . Jeffries, nkinwerya wuupuwela nsina nawe. Anci-ene a nyuwo axinna akina ooreera murima munikhuma oGeorgia, munikhuma mapuro oohiyana-hiyana mulaponi. Mpatthani aka a khalayi, Bill, okilanthi va, kookupali wira ti yoowo, voosiis’ula. Ni—ni anci-ene . . . Ni munna onikhuma oGeorgia vale, athu akivahale efaato ela. Moosuwela, ela—ela ti emosa wa ifaato sooreerexa kintonko aka owara. Kinnoona okhala sana ni yeela, vooreerexa vekeekhai. Ni nyuwo khimureere okhala a maana wa miyo. Kooleelani vale etthu ekikhumelenle, mahiku ala vakhani ookiserya, wa miyo, munimoona mwaha wa xeeni kinnoon’aka wira eyo khireere okhala ya maana wa miyo.

¹⁷ Vano, kookupali wira, Apwiya yatthuna vale, kintthuna kiilipihe vahinatoko aka wira khalayi, kookhalaru. ’Okhala wira, kiroosuwela vano wira ti . . . Vekeekhai, vaamuweryaneya miyo okhwa olelo. Eyo ti, nyuwo khamusuwenle. Eletrokartiokarama saka ni ithu sothene, araayo x inamuna muloko ni thanu na mosa oohiyana-hiyana, ayo, owehawehiwa mw’erutthuni voomalela, yoonihenrye wira kaari mwa . . . oolikana ntoko mutthu ti mutthu aarow’awe okhala, mutthu elapo ya vathi. Tivo kinnixukhuru mwaha wa yeeyo. Masi, ithu sothene, hata wa sothene iyo, ni ooxukhuru ni oomuxukhuru Muluku, ntoko siry’aka, miyo kinnaamini wira Owo nlelo onookisuka mmutekoni mw’Awe, kahi yeeyo Owo okoonin’he awe okathi vakhani eyo ehinatthi, moone, yookitteeliha murima paahi.

¹⁸ Vano, kinoona wira, olelo ohiyu...Muri sana? [Munna Neville oniira, “Ayo, mulopwana.”—Mol.] Mun—munn’ihu ooreera murima ti—ti mutthu mmosa ohirina erala, ti—ti Munna Neville. Nto vakhala wira ookhala a nyuwo aari vaava Ettiminku evinre iiwale mutthak’ole wooreera owo aaruuhaly’awe, wa “murinki wa makhura,” waari ota...Mmosa wa mitthaka soosuwanyeya kitonko aka wiiwa, waari ole Munna Neville aaruuhaly’awe, ni Eroho Yowarya, Ettiminku evinre, wa nikoto nla naamukhaani na ipwittipwitthi Muluku othukumanny’awe.

¹⁹ Vano waahikhale mulattu, Apwiya yasiveliwa vale, nto ni Munna Neville ni ekereja, kintthuna kilavule-tho olelo ohiyu ni kipacerye musera wa, kiireke, Sekunta ohiyu...kiireke, Ttiminku ohiyu, ni Namararu ohiyu, ni Ettiminku enoorwa, musera wa itthu sisomme aka.

²⁰ Nkaakhanle ootthuneya wira kikhale oxipiritaali iwe. Masi awo khiyareere okireerelasa murima, khukivahasa ekatthi ya epantte ya natthaaru y’esisapo. Nto siiso miyo khwaakuxa aBibilia aka, iliivuru saka, khurwana voolilini, khukilaathi vale vooreera-vo, ni kaahikhalana aBibilia aka othene ni itthu mapuro othene. Ni vekeekhai kaahiviriha okathi wooreera, mpakha oruuihwa makhura ale a ikhura vale. Okathi aka wooreera waamanle vaavo. Waari—waari omalamala waka nto. Masi, Munna Pat, kaahoono ohikhala sana vekeekhai. Etthu ile, nkinwerya ovilela. Nto, masi, kaaviriha okathi wooreera, mpakha mahiku mararu wala maxexe oopacerya. Kaaviriha okathi wooreera.

²¹ Nto miyo kaasoma muLiivuruni mwa aEfeso. Oh, okhalihwa iwe wa Ekereja. Ni kinoona wira etthu yooreera. Nto—nto vakhala wira nyuwo... .

²² Vano, mwaarine-ene ekereja onrow’anyu-wo, murowe mwakhale v’opuroni vanyu va muteko. Masi mwaahikhalane ekereja, ni munatthuna otthika olelo ohiyu, ni Namararu ohiyu, ni Ttiminku ohiyu.

²³ Kaatthuna kikuxe, olelo ohiyu, Eliivuru yoopacerya ya aEfeso; ni Namararu ohiyu, ekapiitulu 2 ya aEfeso; ni Ettiminku enoorwa, ekapiitulu 3 ya aEfeso; wira kilokiherye Ekereja. Moosuwela enihimy’aka, ti okhalihwa Waya, v’puroni. Ni kinoona wira t’utekiwa, wa Ekereja. Miyo nkihiyo... .Miyo ki—miyo kinaaleela paahi ale anrwa oTapernakulu Branham.

²⁴ Ni vakhala wira mutthu ti mutthu a nyuwo axinna oophentiwa... .Kosuwela wira atthu kamosa-kamosa a nyuwo, wona waka, mookhalana mithukumano. Mwamunn’ihu ori oSellersburg, ni—ni oohiyana-hiyana, mookhalana mithukumano. Vano, nwehe, iyo mithukumano sa muhakalaliho. Murwe mwa seiyo. Awo arumeyi a Kristu, amiravo aniphwanyaneya v’ephakani, akhumme. Hata okathi ikereja saya sikhoottaly’aya Ekeekhai, ni itthu siiso, awo arookhumasa

memmo. Vano Muluku khuwiihanela muteko. Ayo, mulopwana. Miyo—miyo kinnimuxankela mutthu. . . Nkinwerya hata wuupuwela nsina na mulopwana ene. Masi owo mmiravo, ooyeva erutthu, oophwaneliwa, ni mwaara n'axinamwane oophenteya.

²⁵ Nto—nto Munna Junie Jackson onikhalanaka mithukumano nno, ekhanle exinttelo ekina, yooereera ni yoosuwanyeya ya mahala maalupalexa a Muluku. Nto awo yakhalanasa mihakalaliho mukereja mwanyu, murowe wa yaawo, okhala wira eyo ti yawinyu. . . eyo t'itthu yo wira. Okhala wira, khensuweleya, khino onookhala natampi onrowa waltari, ni khino nyuwo munoovariwa murima wira mmuroihe mutthu uwo wa Kristu, yeeyo enrowa okhala otthuveliwa wanyu wuulupale epante ele ekina.

²⁶ Ola onrowa okhala mwiixuttiho paahi n'ulakiherya Ekereja, va mutapernakulu, nikhaliheriyaka okathi onikelel'ahu ohoolo.

²⁷ Vano, nkiruuahale eroroco aka, vano ohaana okhala mutthu okiweheryaka okathi. Doc ookooniha, wira ohaana emosa. Tivo, munn'aka. . . Nto vano. . . [Munna Edgar “Doc” Branham oniira, “Nkinrowa woovekelani vanci-ene mwaha wa yeeyo,” ni onimunya eroroco awe Munna Branham—Mol.] Khamunrowa okivekela vanci-ene mwaha wa yeeyo? Vaareera. Ahe, vano, ti yooreera. Ahe, vano, nkinkupali wira etthu ene eyo ti yoolikana, opacerya wene. Vano. . . [“Kooxukhuru. Kinrowa ohimya emosa ya nyuwo.”] Vano, oh, oh, sh-sh-sh-sh. [“Miyo kiroohiya ovaha isentavo muloko, wa otthapela wa iyaakha saka, voosiis'ula, wira kiwooniheni oreera.”] Moohiya? Vano eyo ti. . . Eroroco ela eroopacerya ovara muteko sana nto, Doc. Ohimye wira oroohiya ovaha isentavo muloko, wa otthapela wawe wa iyaakha, wira okoonihe oreera, 'okhala wira sookhala piili wala tthaaru sa owo ni miyo. Vano munoowerya woota vatthu vary'aka-vo, mmukwahani. Masi, oh, eyo khenicala hata vakhani, wa miyo. Vano, nkinrowa olavulaxa okathi munci-ene.

²⁸ Vano, yaakhanle-ene aletto mmukhorani mwahu, vekeekhai ninthuna niwaakheleni sana ni murima ahu wothene. Nyuwo muri oorwa sana va etapernakulu ila yaamukhaani. Hiyo khanrina empa yuulupale. Eri yootthokihwiwa vano wira niteke, kahi nipuro nuulupale, masi paahi. . . Nla va khinreere omalamala. Nto ninrowa otthuna oteka ekereja yaamukhaani yoowitthyaaleya va, hiyo nimalakaru. . . Apwiya anitthuniheryakaru wira yeeyo. Ni anci-ene a nyuwo othene munniihipiha mwaha wa yeela, ni vekeekhai hiyo ninnixukhurela yeeyo.

²⁹ Vano kintthuna mukhunle ni miyo, voosiis'ula, wira nisome, mwa Samuweli Oopacerya ekapiitulu 8, ni opacerya muhina wa, nrowe nipacerye muhina wa eversiikulu 19, iversiikuku 19 ni 20, khino, ntoko yoosoma yaamukhaani wa yoohimya.

³⁰ Nto vano, okathi muniir'anyu mphavelaka, ni nihinatthi . . . Ninrowa osoma, nuumala nto ninthuna ovekela. Vano kiireke sookhala soovekela voosiis'ula, ni wira, "Mukuupuwele paahi"? Muthukumano ahu wookiserya, isumana piili sivinre, wala tthaaru, okathi waarin'aka muthukumano . . . Mwiire, hiyo . . .

³¹ Mwa yeeyo, okathi munikhunl'anyu, muthukumano ompacerya oChautauqua, mahiku yeettaka 6 vano. Ninwehererya oviriha okathi wooreerexa, oMiddletown, Ohio. Nyuwo witthyuwa wanyu onoorwa, murowe. Vano othukumana wuulupale wa mapantta, vakhiviru ni muro, weiwo, oh, hiyo . . . elaleeryo yothene muhitonko anyu wiiwa. Othene aya nno ni nno mmuro, alaleyi, khula voosiisu, othana wothene ni ohiyu. Vano othene anthukumana vamosa. Othukumana wuulupale wa mapantta, wo wunnuwexa ovikana Silver Hills, imaara sinci-ene. Ni—ni nto nipuro nuulupale ninweryaneya oheliwa atthu ikonto thanu na tthaaru ni muloko. Ni okathi wothene ti noosareiwa. Ninniviriha okathi muulupale Ohio.

³² Vano Munna mutokweene Kidd, kaaronw'aka onvekelela, voosiisu umosa. Nyuwo othene munuupuwela kooleelakani, isumana tthaaru sivinre? Tothoro aamuvanhe iwoora miloko miili ni xexe, s'okhala mukumi. Owo oovenya ni onimweetta. Owo aalavunle Yoolempwa, esipo ahaawery'awe wiipa. Nto okathi okenly'aka kimuweha, voosiisu uwo, ni ekuwo ele ya mmakhatani mwa yoowo. Kaakhumme va iwoora soophiyaka tthaaru wala xexe 'vahinatthi oxa, wira kiwerye omphwanya. Yaahimmwa wira owo aamookhwa nihiku nle; kankuru mmavoro.

³³ Vano amwaar'awe oophenteya, akhaani, oowuuluvala, yaakatthaka ikuwo wira ephwanye isentavo miloko mithanu khula nihiku; eyo yaari nihiku nihinatthi oxa, mpakha nuumala wiila, mwaha wa isentavo miloko mithanu, wira aiy'awe ekheleke vapuwani ntoko mulaleyi. Aamulaleya muhakalaliho wa isumana piili, ni waakhela soovaha, aaphwanya isentavo miloko mithanu na miraru.

³⁴ Masi kaahiwoonasa ekilanthi-ene vale voosiisu uwo, anaitthoko ale aili, atokweene, ahiso, anaitthoko emosa, akilaanthi vale, n'ikuwo yaamukhaani mmakhatani mw'awe. Nto mmosa w'atthu awe oorukunuxa murima, a miyaakha miloko mithanu na mixexe ni miyaakha miili, ooratta ni ooweeleiwa, ni muPentekosite oomalela, akilaathanse-ene vale, moosuwela. Nto miyo khwira, "Moosuwela mwaha wa xeeni nyuwo atthu oowuuluvala mukilathenly'anyu va? Nwehereryaka ekalawa paahi orwa." Ti yeeyo tu. Muteko aya, sothene aphwanyans'aya, e—ethunelo aphwanyans'aya, vano awo arisa oolikana vano wira erowelase otthuveliwa waya.

³⁵ Nto miyo khimuleela Munna Chev, wira wa Munna Kidson . . . Kidd, voosiis'ule, "Munoorowa okhala muthukumano w'oChautauqua."

36 Owo khukiihana nsana, khwira, “Miyo kiri. . . Kinookhalawo, Munna Branham.” Vaareera.

37 Mithukumano sinci-ene, sa muteko aka musya onoorwa. Munna mmosa, munna mmosa muPatista eemenle va, mwan’awe mwaamuthiyana, mwaaruusi, aarookhala oothipelela vakhani. Nto khimuleela, “Kinoovahani mwan’inyu wa Pwiya Yesu,” nihiku nlo voosiisu. Nto okathi oronw’awe owaani, owo khoopowa. Ni mukina va voosiis’ula, wira opatisiwe ni onookelela ohoolo.

38 Nto mulopwana mmosa, Mwenye Sothmann, mpatthani aka a oCanada, amaathi awe yaahalela okhwa, khwira, “Munimwaaphwanya amaath’inyu akumi, mwaphiya wu, erowaka ovona, sana.” Vekeekhai ti siiso yaary’aya. Nto paahi. . . atthu ekupaliki. Eri woopacerani waya paahi vano, yeettaka. Masi, oh, ninwehererya vasulu va sothene, soohala vanci-enexa. Hiyo nri mahiku ootakhala ni ookiserya, masi okathi woovuwa.

39 Vano mookhalana Bibilia anyu, wira nisome, kapiitulu 8 ya Samuweli? Ni kaahimulaiherya Gene okhala ottuli iwe, wira okaravari ehanle ya yeela. Hiyo naari woopaceryani paahi, mwa muthukumano ahu.

Vano atthu a Isarayeli yaahikhootta wiiwelela moolumo a Samuweli; khwira, Nnari; masi nnookhalana mwene ahu pahi;

Ni hiyo. . .ninthuna olikana. . .ni nloko, maloko othene; mwene ahu onrowa onlamulaka, onihoola, onoowana vamosa ni hiyo.

. . .Samuweli aahiiwa moolumo ala othene a atthu awo, ni. . .khulavula owaruni w’APWIYA.

Vano APWIYA khimuhimeerya Samuweli wira, Mwiwelele nsu naya, mwaavahe mwene aya. Vano Samuweli aahaahimeerya atthu a Isarayeli, Murooke khula mmosa owannyawe.

40 Vano vakhala wira kinootthuna othanla mwa yeela, voosiis’ula, kaarow’aka wiihana ntoko yoosoma, mwa minuutu vakhani sinttharelana, kaatthuna kithanle yoosoma ya: *Mwene Ookhoottiwa.*

41 Owo waari okathi, ntoko mwa okathi wothene, wira atthu khanatthuneke wira Muluku oweetiheryeke. Atthu anthuna weettihiwa enamun’aya mmansaya. Ni wahal’ola voosiis’ula. . . Ni nyuwo mwarowa vale owannyinyu, yaamukhala yooreera nyuwo osoma yothene. Owo waari okathi wa ma—mahiku a Samuweli, mutthu a Muluku, profeta. Ni owo aari mutthu a xariya, ni mutthu ooreera murima, oottittimiheya, oovuwihaya, a nneema ni axariya n’atthu, nnakhala ohiwootothaka, ni ohaaleela hat’etthu yoohikhala SIISO ANIHIMYA T’APWIYA yoolikana.

42 Masi atthu yaahiphiyerya nipuro yaatthunne aya ovirikanya mutthokiheryo ola. Awo yaarimwaaweha aFilisti, ni Amaleki, a Amori, aHiti, ni maloko makina a mulaponi. Ni yaarimoona wira awo yaahikhalana mamwene yaalamula, ni yaaruma, ni yaahoolela, ni yaawana ikhotto saya, ni sikina. Nto khukhala ntoko wira Isarayeli aatthunne otthara mweeryo ntoko mamwene ala, ni ntoko atthu ala.

43 Masi khonakhaleke, hata okathi mmosa, otthuna wa Muluku wira atthu Awe yeetteke ntoko atthu a molumwenkuni, wala orummwa wala weettiheriwa ntoko atthu a molumwenkuni. Atthu a Muluku, ntoko okathi wothene, anikhalaka a—atthu oomeekh'aya, atthu oovirikana, oowiihaniwa wira ekhume, oovalaanyiwa, ni oovirikana voomalela eyiirelo aya, mwa inamuna saya, ni enamun'aya y'okhala, ohiya ele atthu a molumwenkuni arin'aya. Otthuna waya wa itthu, ni opakiwa waya wothene, kweekwe sinikhalaka soovirikana n'itthu iye atthu a molumwenkuni amphavel'aya.

44 Nto atthu a Isarayeli yaahimurweela Samuweli khwira, “Vano, nyuwo moopacerya wuuluvala, ni an'inyu khantthara ephiro anyu.” Okhala wira, awo khiyaari oororomeleya ntoko Samuweli. Awo yaari anamattetekha ni anamakuxa musurukhu. Nto khwira, “Samuweli, an'inyu kahiyo ntoko nyuwo, tivo hiyo ninthuna wira murowe mwaniphavelele mwene, ni mmuttikitthele makhura, ni munikhalihe atthu ntoko atthu akina a mulaponi.”

45 Vano Samuweli khuphavela waaleela wira etthu iyo khiyaarowa okhala sana. Owo khwira, “Mwiira siiso, naanaanoru, munimoona wira owo onooiihana an'inyu othene owannyinyu, aakhalihe anakhotto, wira etthyaweke ohoolo wa ekaaroo awe y'ekhotto, n'ukuxa ikaruma s'ekhotto ni mavaka. Kahi yeeyo paahi, masi owo onooiihana an'inyu axithiyana, aakhalihe anamapaka mikatthe, ni waakumiha wa nyuwo, wira yaalyiheke anakhotto. Ni,” khwira, “ohiya vo, owo onimoolivihani mipoosito, sa epyo anyu, ni soophwanya sanyu sothene. Owo onimoolivihani mipoosito wa sothene iyo, wira olive misurukhu kamosa-kamosa s'olokihwiwa kuveerunu, ni sikina, sinrowa otthuneya wira silinvwe.” Owo khwira, “Kinoona wira nyuwo, munoovonyasa, voomalela.” Masi okathi. . .

46 Atthu khwira, “Masi nnakhala vo hiyo ninthuna okhala ntoko atthu akina.” Yookhala etthu mwaha w'alopwana n'athiyana, wira antthuna ekhaleke ntoko akina. Ni aari mulopwana mmosa paahi otonko okhala elapo ya vathi aari ethoonyeryo ahu, nto owo aari Ole onikhwenle hiyo othene, Pwiy'ahu ni Moopoli ahu, Yesu Kristu. Owo aari ethoonyeryo yooloka ya etthu yaatthuneya wira nikhaleke, okathi wothene aavara muteko w'Atithi, ni iiraka ele eri yooreera.

47 Ni hata wira Samuweli aaphavenle waakupaliha sayi athu, awo yaanimutthara voohiyererya, othana n'uhiyu, "Nimmutthuna mwene. Hiyo nimmutthuna mutthu. Hiyo nimmutthuna mutthu onwery'ahu wira, 'Ola ti muhooleli ahu.'"

48 Nto eyo khenakhaleke otthuna wa Muluku. Khonakhaleke otthuna wa Muluku, wala khonkhalakhala okhalaka otthuna wa Muluku, wira mutthu amweettiheke mutthu. Muluku t'onimweettiha mutthu. Muluku ti Mweettiherya ahu, Mwene ahu.

49 Ni ti yoowoopiha sana-ene, sana-ene olelo, okhala wira mutthu onikhala ntoko orina ankhili yaawo. Enikhala ntoko khanwerya osuwela sana wira nlelo Muluku onnimweettiha mutthu, ohiya mutthu omweettihaka mutthu.

50 Vano awo yaahiithanlela mulopwana mmosa iihaniwa Sawuli, yoowo aari mwaana a Kiixi. Nto owo aari mutthu oosuweleya, mutthu oottittimiheya. Masi uwo aahaaphwanela athu sana, okhala wira, aari a mukhalelo muulupale, oorekama, munethi. Yoolempwa ehimye wira muru awe ni makhata yaakhala vasulu a mutthu ti mutthu wIsarayeli. Owo aarina mukhalelo wa mwene, ni aari ooreera wiitho. Owo aari mutthu oosuwela ni oothamaleya.

51 Vano, owo ti muthinto wa mutthu athu onaasivela omuthanla olelo. Athu khanikhala ntoko ootteeliwa murima ni enamuna Muluku okhalinh'awe Ekereja Awe, wira erummweke ni yeetiheweke ni Eroho Yowarya. Ammutthuna mutthu, mutthu mmosa, muromolelo, athu kamosa-kamosa wira erumeke Ekereja. Eyo, awo khanwerya wiirihelala voomalela mmatatani mwa Muluku, wira ekhaleke a erooho, wira yettihiweke ni Eroho Yowarya. Awo ammutthuna mutthu aapakeleke etiini aya, mutthu onrowa waaleela sana moota wo wira, ni sothene ya yeeyo.

52 Tivo mulopwan'ola aakhala ntoko oophwanela opuro ene voolikana, okhala wira aari mulopwana mmosa oosuwela sana.

53 Nto eyo ti yoolattanexa nnihiku n'olelo. Hiyo onnisivela waathanla athu siiso, nave, wira yeettiheryeke ikereja sahu, wira yeetiheke Ekereja ya Muluku. Nkirina hat'etthu y'opwapwela eyo, masi eri wira kooniherye paahi, wira: kuhiyo, khiwaari, ni khunkhalakhala okhalaka otthuna wa Muluku, wira etthu iyo ekhale siiso. Muluku ori wira oweettiheke athu Awe, wira omurumeke khula mutthu.

54 Vano hiyo ninnoona wira mwaan'ola a Kiixi, mulopwana muulupale, ni—ni orakama wawe, ni yawawe. . .Owo aakhala ntoko oowaaphwanela athu, wira nlaya nawe naamukhala sana mwa yoowo. Ni nleha vamuru wawe, vasulu v'athu othene akina, eettaka, yaamukhala e—efaita y'ekeekhai wa omwene wa Isarayeli. Maana, mamwene makina, a maloko makina, yaamurowa wuupuwela, "Nkanweheni mulopwana

xeeni ule!” Moota yaarow’aya owerya othoonya ekatha aya ni wira, “Nkawehani va, mwene xeeni muulupale orin’ahu! Nkanweheni mutthu xeeni onnihoolela!”

⁵⁵ Ni ti yooriipiha murima ohimya, masi moota ekhanly’aya ekeekhai olelo ni ekereja, sinaasivela wira, “Pastore ahu kahi mutthu a muupuwelo woophureya. Owo mulopwana muulupale. Owo osomme oHartford, wala exikola emosa yuulupale ya teologia. Owo orina ikharawu xexe sa nipuro *khata khata*. Ni owo t’otthuniwa sana eriyari y’atthu.” Sothene iyo siiso sikhhanle-ene sana, ni sookhalana opuro aya. Masi enamuna Muluku orin’awe wa Ekereja Awe ti wira yeetiheweke ni Eroho Yowarya, ni n’Eroho Awe.

⁵⁶ Masi atthu enaasivela ohimya wira, “Hiyo nookhalana muromolel’ola muulupale oniir’ahu-wo mpannta. Hiyo nipacenrye wu mahiku aalipa-oopacerya, okathi wary’ahu vakhani, atthu vakhani paahi, ni ooyeva. Nto vano nihinnuwa mpakha vaphiyenry’ahu okhala kamosa-kamosa wa miromolelo suupalexa sikhhanle. Hiyo nrina ixikola soolokaxa, ni alaleyi oosoma sana. Hiyo nrina atthu oowarexa sana. Ni atthu oosomaxa a mpooma aneetta muromolelo ahu. Ni hiyo ninnaavaha alipa-oohaawa. Ni ninnivara miteko soorera, ni itthu sothene iyo.” Ni nnakhala tu, Muluku akikhottiherye, olavula nuulumo nimosa voovaanyiha eyo, okhala wira sothene iyo ti sooreera.

⁵⁷ Masi, nlelo, kahi p’utthuna wa Muluku wira mutthu omweetiheryeke mutthu. Muluku ooveleeliha, nihiku na Pentekosite, Eroho Yowarya wira erumeke mmurimani mw’atthu, ni oruma makhalelo awe. Khiyaari wira mutthu omurumeke mutthu.

⁵⁸ Masi hiyo onisivela ohimya yeeyo. Eyo etthu yookhumela sana okathi onwery’ahu wira niniira mpannta wa mutthenkeso muulupale.

⁵⁹ “Nyuwo mwa muKristu?” Ti siiso kikumann’aka ni yoosoma ela, okathi waary’aka oxipiritaali. Nto kaanimukoha mmosa, “Nyuwo mwa muKristu?”

“Kiniira mpannta ya *lexe n’ilexe*.”

“Nyuwo mwa muKristu?”

“Kiniira mpannta ya *lexe n’ilexe*.”

⁶⁰ Vano nfurumeera mmosa khurwa mpakha vooililini, vaavo kaamusom’aka Bibilia, ni owo aari n—nfurumeera musya vapuwani vaavo. Nto owo khwira, “Ehaali anyu.” Owo khwira, “Kookupali wira nyuwo mwa Reverendu Branham, va wira nwehawehiwe mw’erutthuni.”

Miyo khwira, “Ka yoowo.”

⁶¹ Nto owo khwira, “Kittikittheleke ettuli anyu, aalikoro wira moone sana?”

Nto miyo khwira, “Muttikittheleke.”

62 Nto okathi aattikitthel’awe ettuli aka, owo khwira, “Muromolelo xeeni w’ekereja muniir’anyu mpantta?”

63 Nto miyo khwira, “Oh, kiniira mpantta wa muromolelo wa khalayixa okhanle.”

Nto owo khwira, “Muromolelo xeeni uwo?”

64 Miyo khwira, “Ti yoole otthokihawe olumwenku hata ohinatthi otthokihawa.”

65 Nto, “Oh,” owo khwira, “exeeni? Kookupali wira nkinsuwela owo vekeekhai.” Owo khwira, “Miyo kiniira mpantta wa ekereja *khata*. Ti yoowo mutthenkeso ene?”

66 Miyo khwira, “Nnari, muhano. Owo orina miyaakha imiya piili paahi sivinre, mutthenkeso yoowo. Masi mutthenkeso ola opacenrye okathi ittheneeri s’oxaka siip’aya vamosa, ni aana a Muluku yaatthapas’aya mwaha w’otteeliwa murima, okathi yoonanse aya Orwa wa Moopoli wira aavuluxe atthu.”

67 Nto owo khuhiya ottikitthela ottuli waka. Ni miyo kaarimuurama vakhani, ntoko *sa*, wira muhan’ole owerye ottikitthela. Vano owo aakhumme waattamela oCorydon, vaava va. Khutthikela nivaanelaka. Nto owo khwira, “Mwenye, kweekwe miyo kinaamini wira vakhala wira Muluku aahinto okhala Muluku, Owo nlelo Mulukuu, olelo, siiso ntoko Owo aary’awe khalayi.” Owo khwira, “Enamwi ekereja aka ekhoottaka yeeyo voowooneya, masi kinnaamini wira eyo Ekeekhaii.”

68 Nto miyo khwira, “Khamurakamenle Omwene wa Muluku, mwaamuthiyana.”

Owo khwira, “Vakhala wira Owo aahinto okhala mpenuxa, Owo nlelo kahi mpenuxa?”

Miyo khwira, “Vekeekhai vene ti yoowo, murokor’aka.”

69 Masi mutthu ontthuna oruma, omuruma mutthu. Ni mutthu ontthuna wira mutthu omurumeke. Khonthuna okhalana Muluku wira amurumeke.

70 Vano mwaana a Kiixi ula, Sawuli, nsina nawe, waari waakhuliwa woolikana wa ethu awo yaatthun’aya, mulopwana mmosa muulupale a estaatu. Nto e... Oh, owo aamuwerya waaholela ikhotto saya, ni sikina. Masi, nnakhala vo, eyo khiyaari enamuna ya Muluku wira itthu. Muluku aatthuna wira profeta Awe oororomeleya ni mutokweene oweettiheke, ni waaleela Masu Awe.

71 Vano, olelo, okathi ahu muulupale wa ekereja onikhal’ahu, hiyo, kinoona wira, ni kinnaamini yeela ni murim’aka wothene, wira vekeekhai hiyo nneetta voovirikana n’ile Muluku onirummy’awe wira niire. Masu ookiserya a Moopoli ahu yaari a Marku 16. Ohimnye wira:

Murowe mulaponi mothene, mwaalaleerye athu othene ehapari yooreera.

Ole onrowa waamini khupatisiwa onimooopowa; . . . ole ohinrowa waamini onoolamuliwa.

Ni ithoonyeryo iya sinimwaatthara ale anrowa waamini; Mwa nsina n'aka awo anoowoomola axetwani; enaamulavula elavulelo esya;

Vano yavara inowa; wala . . . owurya . . . itthu siniiva, khinaakhumelela etthu yootakhala; nave awo ya . . . yawiixaatherya matata aya aretta, . . . awo anoopenuwa.

⁷² Khaavo mutthu, khaavo hata mwaana a Kiixi, wala hata mukina, onwerya okumiherya eyo ohihooleliwe ni Eroho Yowarya. Masi hiyo noopaka ixikola, noopaka iseminaariyu, ni noopaka mitthenkeso, wira—wira sinitteelihe murima, ni wira nooneyeke ntoko athu akina a molumwenkuni.

⁷³ Vano, Eroho Yowarya ti yaakhalaka Muhooli elapo ela. Elapo ela yeettiheriwaka okathi wu o . . . okathi otthokihiw'aya olaleiwa w'etaphuwelo. Ni yaahikhala ekhatera yaahanle vale. Khiwaavo ohoverya hata vakhani mmuruni mw'aka wira Mwaana a Muluku aakilaathiki vameesa vale, okathi elapo ela ekhalihiw'aya sittharihiwaka sooruma sa otaphuwa w'etiini n'utaphuwa w'athu othene, ni vasulu va mulipiheryo wa Masu a Muluku Oohimala.

⁷⁴ Masi hiyo noohonona eyo. Ipoliitika; hiyo nihaakeliha athu mmo ni mwaathanle ahu, vathi va othuma n'utumiha, ni anatiri oowootha. Mpakha . . . Elapo ahu, ni ipoliitika sahu, ni omwene ahu w'athu, ti soopahuwa mpakha siry'aya—siry'aya soothavana ni komunismu ni inamuna sothene sa ismu.

⁷⁵ Nto imaara sinci-ene ninvekela mavekelo mwaha wa mithukumano, okathi oxirikha wa maloko onthukuman'aya, nto vo . . . wala wira evaanyihane myaha. Nto mwa okathi mmosa, muulupale, naanaano, hata emaara emosa khiyaavekenel mavekelo. Ninrowa ophiyerya sayi olakiherya ivirikanelo woohikhala mavekelo? Vanweryaneya sayi hiyo okhalakhala niwehereryaka, molumwenkuni mothene, okhalakhala niiraka etthu woohikhala ni ohoolela wa Eroho Yowarya?

⁷⁶ Masi mukihiye kihimye ela ni mphento ni ottittimiha elapo ahu ni epantera aya, ni erepuuplika eyo enthoonyerya aya. Hiyo noomukhoota Muhooli ahu, Eroho Yowarya, vano n'ipoliitika soohononeya khwaakeliha athu a muupuwelo woopahuwa. Nto mwaahiwehe, awo anoorowa wira ivonyeryo soomalela wiiva ahitonko aya wira, naanaano va, okhala wira athu anthuna wira mutthu orumeke.

⁷⁷ Etthu ennitthuna epooma yuulupale ya Estadu Unidu ula, ntoko mukhulupale, etthu ennitthuna oKonkreesu, etthu ennitthuna mpwaro mwahu wa nlamulo, athu avaherenrye

makhalelo aya wa Muluku, ni ari oosareya Eroho Yowarya, ni aneettihiwa ni eyeettiheryo Awe y'eMuluku. Masi, ohiya vo, hiyo ninaathanla atthu oosoma, atthu anooneya "ntoko oothunku, ni ankhootta Owerya wa Muluku," atthu ari oohimutthuna Muluku, ni imaara sikina ootepa ovikana eyo, hiyo nnimwaakeliha muhina wa ipoliitika sahu, sa elapo ahu.

⁷⁸ Kahi yeeyo paahi, masi mukereja mwahu. Ikereja sahu siri soohononeya mwaha wo wira hiyo, naathanlaka amakhampusi ahu wira enihoolele, hiyo nroorowa oseminaariyu khwaathanla atthu ari asuweli aalupalexa, atthu ari a muupuwelo muulupale, atthu ari ooxuttihiwaxa, ni ari oothunaxiwa eriyari y'atthu, ni ari atthu oottittimiheya wa anamaitthoko, yeeyo ehirin'aka hat'etthu yoopwapwela. Atthu ari ooreera murima mwa enamun'aya yo weetta, ookasopa mwa enamun'aya y'okhala, ni moota aniiseettih'aya eriyari y'atthu akina, ni eriyari y'atthu, atthu aalupale muhina mwa mapuwa aya, yeeyo ehinlavul'aka voonanara-vo. Muluku akaakiherye wira erooho aka yaamukhalakhala etakhalaka siiso. Masi, nnakhala vo, eyo kahi ile Muluku onithanlenly'awe.

⁷⁹ Ti ohoolela wa Eroho Yowarya: Kristu mmurimani mw'atthu. Anci-ene a atthu awo oosuwela anikhala mpulpitu mwahu annikhootta ekhalelo y'ekeekhayi ya Eroho Yowarya. Anci-ene aya annikhootta wira wookhala ovoniha wa Muluku ni Owerya wa Eroho.

⁸⁰ Miyo kaamusoma artiiku mmosa, nsana, kookupali, ipaphelo soothikilasiwa sa xornaale saamuhimya Jack Coe, Jack Coe okhwiiye, e... mmosa w'alipa orukunxa murima awaka wa Pwiya Yesu, yoowo aari mulopwana mmosa oowerya a faita, mahiku awe. Nto aarimwiihaniwa wira akohiwe, oFlorida wu, mwaha w'omuvekela mwaana mmosa wira orule ekaruma mmettoni mwawe, wira ovire vaplataforma eettaka. Nto airaka siiso, mwanamwan'owo khweetta vaplataforma, voolikana-vo, nto khumora vaphinye awe w'ame awe. Yothene yaari eyiirelo ya nwanani a Kristu, mwaamuthiyan'ola n'aiy'awe khimuroiha munn'ihu oominyala mpwaro m'ophukiwa wa mulaponi.

⁸¹ Nto okathi waatthuney'aya khula ekereja omukhaliherya Munna Jack, okathi waatthuney'aya khula mutthu a mukereja onromola Nsina na Yesu Kristu okhala ni yoowo, voominyala-vo, khula mutthu oniihana Nsina na Pwiya Yesu aahaana omora okokhora avekelaka. Masi, ohiya vo, vamyaha suulupale sa xornaale, yaahimye wira mmosa wa miromolelo sahu suulupale waatakanxale matata n'ale oohimutthuna Muluku, wira emulamule, emutthukwele Munna Jack Coe. Mwaamuwerya otthokelela ekereja, eniisiihana ni Nsina na Kristu, otakanxana n'ale oohimutthuna Muluku, wira emulamule mulopwana ooreera murima aatthuna ni murim'awe wothene omweemererya Bibilia? Masi awo yaahiira.

Vano nto Munna Gordon Lindsay khurwa omoopola.

⁸² Nto okathi mphuki oohaamini iiraly'awe, "Mulopwan'ola t'othepya okhala wira oookumiha ekaruma ya mwaan'ole khimuruma weetta vaplataforma, ni khuhimya wira 'aahivona.' Vano khootha, ni khwira etthu yoovirikana n'ile tothoro aarummy'awe, tivo owo ookhalana mulattu w'othepya onimulamula."

⁸³ Nto Mwenye Coe khivenya, khwira, "Mulopwana, miyo kinnivaanyiha ehimyeryo eyo. Muluku aahimuvoniha mwanamwan'owo."

⁸⁴ Vano mphuki khwira, "Kinoomukoha mutthu ti mutthu mpwaro mu vakhala wira nuulumo nlo naamukhala ekeekhai, wira Muluku aamuwerya onvoniha mwanamwan'ole epantte emosa ya plataforma, khimuhiya owereiwa epantte ekina. Vakhalaru wira nuulumo nlo nnoweryaneya wooniheriwa ni Bibilia, nto kiniira wira Mwenye Coe ookhalana ehaakhi ya nuulumo nawe."

⁸⁵ Vano mulaleyi mmosa khivenxa ntata, khwira, "Oottittimiheya, mwenye, kinoowerya ohimya?"

Nto mphuki khwira, "Himyakani."

⁸⁶ Vano mulaleyi khivenya khweemela, khwira, "Ohiyu umosa, mphareya m'owali, okathi ekalawa yaamukhaani yaahale'aya osama, nrromelo wothene wo woopoliwa waahimala. Awo khumoonasa Yesu, Mwaana a Muluku, orwa eettaka vasulu vamaasi. Nto mmosa a arummwa, iihaniwa Petru, khwira, 'Mwaari Nyuwo, Pwiya, mukirume kirwe wa Nyuwo vasulu vamaasi.'" Nto owo khwira, "Apwiya khumwiirela murummwa Petru, 'Rwaakani.' Nto owo khikhuma mukalawani, mwenye, eettaka sana ntoko Yesu, eettaka vasulu vamaasi. Masi okathi otuthunw'awe, khupacerya osama ohinatthi ophiya wa Yesu."

Mphuki khwira, "Mwaha woomala."

Ennitthuna ohooleliwa ni Eroho Yowarya, kahi atthu oosoma.

⁸⁷ Sawuli, mwaana a Kiixi, aahikhalihwiwa nto mukhulupale eekhotto a atthu, vano owo aahaakuxa alopwana ikonto piili, ni Yonathani khwaakuxa ekonto emosa. Vano Yonathani khurwa mpakha nipuro noowaakihwiwa n'anakhotto khuwiiva nikhuru n'Amoni, kiireke, a Amoni. Nto okathi—okathi owiivaly'awe, Sawuli khurumiha nlope, khwira, "Moone etthu Sawuli iiraly'awe." Owo khupacerya wiisinnuwiha.

⁸⁸ Vammal'awe mutthu okhala Totori muulupale a Divindade, wala waakhela etthu yaamukhaani ottuli wa nsina nawe, owo onikhala, p'uhimya wene, namasuwela sothene.

⁸⁹ Atthu a Muluku anikhala atthu oowiiyeviha. Atthu a Muluku t'atthu oowiiyeviha. Mwaamoonaka mutthu onihimya wira ohaakhela Eroho Yowarya, n'upacerya wiivalaanya, ooneyaka

ntoko, khorina Waamini, eettasaka iwo, eereryaka okhala etthu ohikhanly'awe, muupuwele paahi, khomwaakhenle Pwiya Yesu.

⁹⁰ Vano nmoona wira nwanani ookela. Nto owo aamurowa okela eriyari ya nikhuru naamukhaani n'atthu a Muluku, ni aarowa okumiha niitho noolopwana na khula mutthu.

⁹¹ Ti yeeyo nwanani kweekwe enerery'awe wira, okumiha maitho oomaili, awerya vale, wira atthu ehiweryeke woona eniir'aya. Ti yeeyo Satana oneerery'awe omwiiriha olelo khula muKristu, okumiha woona wawe wa erooho, wira otthareke eyoonelo ya itthu w'ankhili paahi, ni woohikhala eyoonelo ya Eroho Yowarya emuhoolelaka.

⁹² Vano nto vairans'aya siiso, okathi oxinttiwa wuulupale wiireiye aya, vano Sawuli khuhita inyompe piili suulupale khwaaveleeliha atthu othene. Nto kaatthuna wira nwehe va, wira okathi Sawuli oveleenly'awe ipilikisa sa inyompe w'atthu othene a Isarayeli, ni khwira, "Ole ohinrowa omutthara Samuweli ni Sawuli, okhale, enyompe ela, okhale ntoko *yeela*." Munnoona moota aatthun'awe voothepya-vo wiisooniherya ni mutthu a Muluku? Moota—moota yahaakhanly'aya y'ekristu! Woova w'atthu waari mwaha wa Samuweli. Masi Sawuli aahiwiiriha othene aya omutthara okhala wira atthu yaamoova Samuweli. "Otthariwe Samuweli *ni* Sawuli."

⁹³ Nto imaara kavi, olelo, siiwaly'ahu yeeyo! "Hiyo na Ekereja yuulupale. Hiyo na Ekereja ya Kristu. Hiyo na Ekereja ya Muluku. Hiyo na *e-elexe n'ilexe*." Eyo ennaakhaliha atthu woova, ni wuupuwela wira vekeekhai ti vaavo Muluku onivar'awe-vo muteko. Vano awo khandthuna ohoolela wa Eroho Yowarya. Awo annamputi omutthara mutthu siiso, okhala wira onaasivela otthara makhalelo aya aneene. Onaasivela waamini ile antthun'aya waamini.

⁹⁴ Nyuwo munnoona? Eroho Yowarya ti Mphuki ahu. Muluku khonanivaheke paapa, wala piixipu, wala mutthu ti mutthu, wira okhale Mphuki. Eroho Yowarya, oMutthu wa Muluku, mwa mukhalelo wa Eroho Yowarya, ti Mphuki ahu ni Muhooleli ahu. Vano, ekhalenleni siiso?

⁹⁵ Xontte mukilevelele nuulumo nla noohifayi, noohifayi sana. Nkinlakela wira nikhale noonanara. Kinihimya ni mphento.

⁹⁶ Masi Eroho Yowarya enihimya wira ti yoonanara axithiyana ahu omettha ikharari saya. Ni to yoonanara axithiyana ahu waawara akaputtula axikhaani ni ikalsa, ni wiipintari iyano saya ni wiitho ni etthu enipintari. Eroho Yowarya enihimya wira ti yoonanara.

⁹⁷ Masi hiyo nintthuna wira atthu enihimeeryeke wira ti yooreera, "Vakhalaru wira nimmutthara miyo ni Samuweli." Onaasivela okhala mahiku mathanu na mosa, khula enamuna antthun'aya okhala, n'urowa okereja Ttiminku voosiisu. Ni mutthu oosoma ooratta oosomihiwa okoleexiyu orina ikharawu

sinci-ene onwerya waalaleerya mutthaka mwaamukhaani onrowa...ni ipwera vakhani memmo, saarowa waatekenya owaruni waya ni waakhaliha ootthekula, ntoko efiilime wala eprokrama ya mutelavisawuni. Ni wira nivekelo naamukhaani, ni waaruma orowa owaani ni muthinto mmosa wa—wa nrromelo wo wiisiveleliha wira aatthariha etiini aya. Eyo kahi p'utthuna wa Eroho Yowarya.

⁹⁸ Eroho Yowarya entthuna wira mukhaleke vooreera murima, khula nihiku na esumana, ni khula ohiyu, mwiivalaanyaka n'itthu sa molumwenkuni.

⁹⁹ Masi ekereja khentthuna eyo. Awo ammutthuna mutthu onwerya—onwerya omutaphulela Bibilia ntoko awo sintthun'aya omwiiwa Yoowo. Awo khanrowa wiiwelela nsu na Eroho Yowarya nilavulaka mwa Bibilia. Anci-ene a awo antthuna yiireke, “Mahiku a miiriirya aamala.” Ti yeeyo enaatekenya atthu. Awo antthuna yiireke, “Khokhanle opatiiso wa Eroho Yowarya.” Atthu khandthuna weetta hata voovirikana n'atthu akina a molumwenkuni. Awo khandthuna orowa mphironi n'ukhala ni wiitho woorapihiwa, ni—ni alopwana owooneya okhala vooreera, ni woohikhala asikaro mwaano mw'aya, ni—ni asikaro, ni milapi, ni—ni itthu alopwana siniir'aya. Ni athiyana antthuna ikharari soomethiwa sookhuveya sana, n'u—n'uwara ikuwo sikhaani, yoonihaka ikhalelo saya, ni itthu awo antthun'aya. Awo—awo anaatthuna alopwana anrowa waahimeerya wira, “Eyo ti yooreera.”

¹⁰⁰ Vano, nihiku nlo ohiyu, va aahirwa mulopwana mmosa okileela, wira okhala wira kaaroolaleerya kivirikanyaka yeeyo, wira muromolelo muulupale, soophiyaka thanu wa seiyo, khwira, “Nnohiya waakhaliherya aMunna Branham ni nihikhale nnaata n'awo. Ahiso munooottottelasa ifiita sothene, n'uvekela oleveleliwa mwaha wa seiyo, ahiiso hiyo nnoohiya wookhaliheryani.”

¹⁰¹ Miyo khwira, “Miyo kinookhala ni Masu a Muluku. Yakhala wira entthuneya sothene siri mwa makhalelo aka, miyo kinookhala ni Masu. Nto miyo . . .”

Khwira, “Ahe, khimwaakhanle oottottelasa efiita *khata khata?*”

¹⁰² Miyo khwira, “Miyo nkinalaleeryeke etthu p'itthu, kookhalaru, kintonko aka wuuleliwa muru. Nkinttottelasa hata ifiita hata itiisku. Kinookhala n'ile Eroho Yowarya enihimy'aya. Kinikhala ni yeeyo kinookhwa ni yeeyo.” Nkineererya wiihimya mmansaka yoomi vano. Masi kintthuna woovahani eyooniheryo y'etthu eniiraneya, wira moone ni musuwele sana. T'atthu antthuna ohooleliwa n'atthu.

¹⁰³ Awo khiyaamutthuna Samuweli. Vano Samuweli ohinatthi otthikittheliwa makhura ntoko mwene . . . ahiso Sawuli, mwene, kileveleliwe, Samuweli aahaarweela-tho. Nto kinrowa olavula

mwa malavulelo ntoko yaarow'aya ohimmwa olelo. Musomeke. Owo iirale, "Mulattu aya t'uvi Muluku okhala Mwene anyu?"

"Ahe, hiyo khanimmoona Muluku."

¹⁰⁴ "Ahe, miyo ka murummwa Awe." Samuweli khwira. "Kaahinto wooleelani etthu p'itthu yooonyeya? Kootoko ohimya etthu yahiiraneieye ntoko saahimmy'aka wira yaamwiiraneya? Nkoolalenryeni Masu a Apwiya? Ni kinimookohani ila. Kaahinto orwa wa nyuwo ni woovekelani musurukhu anyu? Kaahinto okuxa etthu anyu? Kaahinto wooruuhelani etthu yooikhala SIISO ANIHIMYA T'APWIYA? Ni Muluku oolipiherya eyo, khula okathi, wira yaari Ekeekhahi." Ni Owo oomurumiha mwanamkhaya n'ipula (Nyuwo munnisuwela Yoolempwa, nyuwo, vo.) wira elipiherye wira Samuweli aari namuhupi a Muluku.

¹⁰⁵ Nto ntoko Samuweli ooniheny'awe voolikana, olelo, Eroho Yowarya. Eroho Yowarya ti namuhupi a Muluku onlavula voolikane-ene ele Bibilia enihimy'awe, enaamini voolikana ele Bibilia ehimmy'awe, ni khenrukunuwa hata vakhani, erowaka ehiyaka Yaawo.

¹⁰⁶ Masi awo yaamutthuna mutthu aarowa waaleela voovirikana. Ni atthu khiyaakhanle oohimya wira oprofeta wa Samuweli khiwaari wooloka. Awo yaahaakhula khwira, "Samuweli, sothene sihimmy'anyu mwa Nsina n'Apwiya, Apwiya aahiirha siiso ntoko saahimmy'anyu. Khekhanle hata evonyeryo emosa. Khamunatoko onirweela n'univekela musurukhu ahu. Nyuwo muniilyiha mmansinyu. Nyuwo khamunatoko onivekela wira niwiireleni, etthu p'itthu yuulupalexaxa. Nyuwo munnimuroromela Muluku anyu, ni Owo ohoovuluxani mwa itthu sothene. Ni moolumo anyu t'ekeekhai. Itthu sothene silavunly'anyu mwa Nsina n'Apwiya saari ntoko saahimmy'anyu. Masi nnakhala vo nimmutthuna mwene."

¹⁰⁷ Munniwerya woona evirikanyihelo? Munni—munniwerya woona o—ocencera wa xetwani, onwerya ovara muteko mwa mutthu? Ohiya wiivahererya wa Eroho Yowarya, ni wiwelela ele eri SIISO ANIHIMYA T'APWIYA, wa makhalelo ooloka, ni mukhalelo woohipahuwa, wa makhalelo oovirikana, atthu oomeekh'aya, nloko n'owarya, atthu aneetta enamuna yootikiniha; awo anamputi olikana n'ulumwenku, ni wira ntoko olumwenku, ni orowa ekereja kamosa-kamosa eniira, "Ti yooreera, mwiireke siiso ni mukeleleke ohoolo."

¹⁰⁸ Munniwerya woona exeeni iyo? Awo aniira, "Khekhanle etthu ene eyo ntoko ovonihwiwa. Oh, opatiiso wa Eroho Yowarya waari mukhaliho wa ekereja." Mwa moolumo makina, vano Muluku khwaakuxa atthu, khikumihwa Eroho Yowarya Mukereja, kuhuhiya muromolelo oteka Yeeyo. Nnakhala, nnakhala. Khekhanle etthu ene eyo. Eroho Yowarya, Masu a Ekeekhai,

yaari wira yoochooleleni mpakha Yesu orwa. Masi ti siiso yi–yiiraneiy’aya.

¹⁰⁹ Sawuli aahiphwanya owerya. Owo muulupale...Owo aahikhalana atthu anci-ene oomutthara. Oh, owo aarina ikaruma s’ekhotto sooreera. Aahikhalana alipa-oowiipa. Aahikhalana makula owiisaakihano, ni aahikhalana mavaka. Oh, owo aanaarya ovikana maloko othene makina. Owo aahaaphiiha momwene w’atthu ovikana etthu p’itthu mutthu aatonko awe wiiwa.

¹¹⁰ Nto ti yeeyo miromolelo sahu n’ikereja sahu siniir’aya olelo. Hiyo nrina ipa suulupale s’ekereja mulaponi. Hiyo nrina atthu oowaraxa sana mulaponi. Hiyo nrina isomelo suulupalexa saakhanle ooruuhiwaka.

¹¹¹ Ntoko axilopwana ooxuttihiwa a Sawuli yaawerya ohakhinya nivaka nle, ni weettiherya ni matata mpakha maloko othene owoova. Awo yaari atthu ooxuttihiwa, ni sothene. Masi, nihiku nimosa, waahirwa okathi mmosa aakhanly’awe mulipa-oo-paca. Vano eyo yaahiwuukhula vanci-ene anakhotto othene a Isarayeli mpakha okhala, ethukumelaka mwaha wo woova. Koliyathi aarimwaatharimula, “Vakhala wira Muluku anyu t’ile munimuhimy’anyu okhala! Nyuwo mw’ale oomalela wiixuttihiwa.” Vano owo khwaatharimula. Awo khiyaasuwela etthu yo wira. Ikaruma saya, s’ekhotto sooreera ni sookutthiwa khisaarowa ovar’etthu. Mavaka aya khiyaarowa ovar’etthu. Yaahikhala etthu emosa awo yahiiwaly’aya, toko, yaakhumelela.

¹¹² Nto ni nlemeliho wothene ni nttittimiho vooreera-vo murima, ni nttittimiho n’iphwaneliho, mphento ni opatthana w’eKristu, kinihimya ela. Miyo kaahisoma, nihiku nimosa, vaxornaaleni ya w’Afrika, vaavo mwan’ihu a Kiixi, mulipa-oo-paca a elaleeryo ya ehapari, okathi Mmaka mmosa aamupance awe, Billy Graham. Khwira, “Muluku anyu aari Muluku, Owo aavonihe aretta ntoko Owo saahimmy’awe wira aamwiira.” Vano mwaana a Kiixi, n’anakhotto akina, khumaala khikhuma elapo ele, ooxinttiwa ene. Eyo ti yoowuuliha muru. Muluku ahu Mulukuu.

¹¹³ Hiyo nrina ikereja sahu sooreera. Hiyo nrina elaleeryo ahu ehapari yooreera. Hiyo nrina alipa-oowiipa ahu anilinwva. Hiyo nrina ikoraale sooreerexa; anamukattha ooripithuwa oorekamexa mulaponi. Nrina atthu oolokaxa, misurukhu sinci-ene. Hiyo nrina atthu oosoma. Nihaana teologia ooratteliwa sana; ninniweyera omulaleerya; ninniweyera omuhimya. Hiyo ninniweyera olaleerya ehapari ni waaruuha atthu, ni waarukunxa murima, atthu imilyawu sene khula eyaakha, waakeliha mukereja. [Nipuro vahiitthu mufiitani—Mol.] Alipa-oowiipa ahu anilinwva, elaleeryo ahu ehapari voosoma, khansuwela moota w’okumana ni mutharimulo ntoko owo. Awo khansuwela hat’etthu ya yeeyo. Awo khansuwela hat’etthu ya owerya

Wawe w'ovoniha, wa opatiiso wa Eroho Yowarya, ya owerya onwerya okumiha eruku ya mutthu onookhwa ni kankuru, n'umukhaliha ootaphuwa. Awo khansuwela hat'etthu ya yeeyo. Awo khayiixuttihawe vapuwani vo, ntoko Sawuli ni nikhuru nawe noopakiwa n'atthu naary'aya.

114 Masi mukihye kaalele atthu a Muluku, ni nyuwo aana, wira musuwele wira Muluku khonoohiyani muhirina namoona.

115 Sawuli, ohisuwelaka, Sawuli khaasuwela hat'etthu ya yeeyo. Masi Muluku aahikhalana Davidi mwaamukhaani wiithela wa mwaako nipuro nlo, ahaalyiha ipwittipwitthi ni malaxi eenamukuttho. Owo eettiheryaka mpakha mmaasini ooriirya ni malaxi makithi. Owo aacaliwa ni ipwittipwitthi s'atithi awe. Vano yakhala etthu jaarwa, nwanani, wira owere epwittipwitthi emosa y'atithi awe, owo aanisuwela Owerya wa Muluku w'ovuluxa epwittipwitthi ile.

116 Muluku nlelo ookhalana Davidi, nipuro nlo, onsuwela etthu enihimya ovuluxa emosa wa ipwittipwitthi sa Muluku, ni Owerya wa Muluku. Owo nlelo onnisuwela mwah'owo.

117 Owo aahiroromela. Owo khaasuwela hat'etthu ya ikaruma s'ekhotto sa Sawuli, khaatthuna hata vakhani yeeyo. Owo khatthuna hata mmosa wa miromolelo saya. Owo khaatthuna ikaruma s'ekhotto sa khalayi mwa yoowo. Owo iirale, "Miyo nkinsuwela hat'etthu ya yeeyo. Masi mukihye kirowe mwa Owerya miyo onsuwel'aka." Owo aahilyiha ipwittipwitthi s'atithi awe. Owo aahikhapelela malaxi. Owo aahivaha yolya y'ekeekhai, n'iyoo saahikhala sikumi ni saahinnuwa.

118 "Mutthu khonkhala mukumi ni yolya paahi. Masi ni Masu othene anikhuma mwaano mwa Muluku, mutthu onookhala." Makhampusi eekeekhai onnilyiha. "Yesu Kristu mmosaru nsana, olelo, ni mahiku othene." Nto vakhala wira nwanani onoovara emosa, n'eretta, owo onnisuwela Owerya wa Muluku.

119 Nkanweheni Davidi mwaamukhaani, eemenle-ene vale. Khwira, "Mmirav'ole nakhottoo, okhuma oyariwa wawe. Ni okhuma emiravo awe, owo khonsuwela hat'etthu woohikhala nivaka n'ikaruma s'ekhotto. Owo t'oxuttihiwa oratteene. Owo teoloku. Vano nyuwo khamunsuwela hat'etthu ya yeeyo."

120 Owo khwira, "Eyo ekeekhai, mulopwana. Miyo nkinsuwela hat'etthu ya wiixuttihiwa wawe wa teologia. Masi yookhala etthu emosa ensuwel'aka, wira, okathi nwanani aarwiiy'awe, wira owere emosa wa ipwittipwitthi s'atithi aka, miyo kaahirowa ni Owerya wa Muluku. Miyo khwaakiherya. Kaahiruuha voolipa khutthikela okhalana ekumi. Kaahiruuha-tho vamaalaxini makithi ni maasi ooriirya. Nto Muluku yoowo omuvaherenrye kharamu mmatatani mwaka, ni miyo khumwiiva okathi owo aakunx'awe emosa wa—wa ipwittipwitthi s'elopwana, ni Owo ookitthuniherya wiiva ekhaya, siiso Muluku a Wirimu onoorowa ni miyo wira kimwiive muFilisti ula oohilya masoma."

Hiyo onnitthuna ohoolela wa Eroho Yowarya. Miyo nkinsuwela mahiku aka; khaavo onsuwela.

¹²¹ Voosiisu umosa kaarimummaathi voolilini vaka. Nto kaari...kaaroorupa, vano miyo khuloha wira Yosefe aamuwereiwa, ni wira kaahimuyaara wira kinvekelele. Vano okathi ovenny'aka, nkaareere okattyamiheya. Miyo khwira, "Ahe, khino Yosefe onrowa owereiwa."

¹²² Nto miyo khuweha, eviraka ohoolo waka, eruku emosa, yaamukhaani yooripela, kiireke ya muthinto wookhwila. Nto yaakhala wira kaari miyo. Vano miyo khuweha. Vano ottuli aanirwa Mutthu mmosa ootteela, nto aari Yoowo. Miyo khwaaweha amwaar'aka, wira koone sinto yaahivenya, wira kiwoonihe, wira awo ewerye woona yoowoona ene. Masi awo yaamurupa.

¹²³ Miyo khwira, "Oh, mukilevelele, Pwiya. Masi, awo anikhala makhalelo aka. Nyuwo munikhalaka ookikakhela sothene siniir'aka. Khula okathi etthu p'itthu yiiraney'aya, miyo koono wira mwaari Nyuwo mwaaira. Vano koosuwela wira aari Satana eereryaka okikhalaha ottaiwene wa yeeyo." Miyo khwira, "Vaakhanle wira mwaamukihooolela paahi." Nto okathi owenhe aka, kaahoono ekhove yooreerexa etonko aka woona mwa mutthu. Owo aari ohoolo waka, owehaka ottuli. Owo khuvenxa ntata Nawe khuvira nawaka, khupacerya weetta orowaka epantte *ela* nno. Yoowoona ene khukihya. Ettiminku evinre voosiisu, miyo kaari, kaahivenya oxaka ene. Eyo yaari Saapatu, yoowoona *ela*. O . . .

¹²⁴ Okathi wothene kaanixanka, okathi wothene kuupuwelaka okhwa. Eyo, miyo kirina ene miyaakha miloko mithanu, ti, okathi aka kahi...nkuupuwelaka wira wari okathi munci-ene. Ni kaatthuna osuwela etthu kaarow'aka okhala muteyofaniyani mme, erutthu ya wirimu. "Kiireke kaamurowa owoona axipathani aka ooreera murima ni, wira, etthapwe yaamukhaani yootteela eviraka, ni wira, 'Munna Neville ole onrowa vale,' wala, owo khaawerya wira, 'Sayi, Munna Branham'? Nto Yesu arwa vale, kaamukhala-tho mutthu." Miyo imaara sinci-ene kuupuwelaka yeeyo.

¹²⁵ Kaaloha wira kaari epantte Onkela nsuwa. Nto kaarwa kiviraka mmatta mwa artimiisiya, nto amwaar'aka yaari ni miyo, ni naahimiserya ihopa truta. Nto miyo khweemela khi-khihula mukhora. Nto osulu waari wooreera-wo. Khiwaakhala ntoko onikhal'aya-wo vasulu v'ekhatu va. Waari wooripelela, ni meeku ooreera ootteela. Nto miyo khwaaleela amwaar'aka, miyo khwira, "Naahaana orwa nno, khalayi ene, oophentiwa." Awo khwira, "Mwaha w'anamwane, naahaana wira nirwiye ene, Billy." Miyo khwira, "Eyo e . . ." Vano miyo khuvenya.

¹²⁶ Miyo kuupuwela, "Nkinreereke oloha! Mwaha wa xeeni?" Vano miyo khuweha, nto awo yaammanthi vakhiviru ni miyo.

127 Nto miyo khuphiteerya vamusaauni vaka, ntoko anci-ene a nyuwo otonko anyu wira, khuhela muru aka wa—waamuru w’olili, khuhela matat’aka ottuli waka. Nto kaammanthi vale sa. Nto miyo khwira, “Ahe, miyo kaatthuna kisuwele paahi moota enrow’aya okhala, epantte ekina. Miyo koophiya iyaakha miloko mithanu, ni nkinatthi wira hat’etthu nlelo. Vaakhanle wira kaamuwerya wira etthu paahi yo waakhaliherya Apwiya, maana koosuwela wira nkinrowa okhala ookhwa. Nuusu n’okathi aka woorowa, mano, wala ovikana nuusu. Vakhala wira kinookhala mukumi wira kuuluvale ntoko atthu aka, nlelo nuusu n’okathi aka woorowa.” Vano miyo khuwehaweha. Nto kaammanthi vaavale, kitthunaka ovenya. Yaari ewoora yoophiyaka thanu na piili. Miyo khwira, “Kinoona wira kinoorowa okereja, voosiis’ula. Kalala vammilo, kaatthuna kimwiwe Munna Neville olaleyaka.”

128 Vano miyo khwira, “Moovenya, oophentiwa?” Nto awo yaamurupa vathi.

129 Ni nkinthuna wira nyuwo muhaleele ela. Eyo yookirukunxa. Nkikhanle ookhala-tho Munna Branham yoole kaary’aka.

130 Vano miyo khuweha. Nto kaaniwa Etthu, yaakhala yiiraka, “Nyuwo munoopacerya-ru. Mwiilipihe owana ekhotto. Mutthikele mwiilipihaka.”

131 Miyo khuttikinya muru minuutu mmosa. Kuupuwela, “Ahe, khino miyo kinimuupuwela siisa paahi.” Moosuwela, mutthu onoowerya waanyiherya itthu kamosa-kamosa. Nto miyo khwira, “Alaleka miyo kirimwaanyiherya yeeyo paahi.”

Eyo khwira, “Mwiilipihe owana ekhotto. Mutthikele murowaka. Mutthikele murowaka.”

132 Miyo khwira, “Khino miyo kiroohimya.” Nto miyo khuluma iyano saka, khuhela ntata vayanoni vaka.

133 Vano Eyo khurwa-tho, khwira, “Mutthikele mwiilipihaka paahi. Vaakhanle wira mano mwaanisuwela eri wookiseryani w’ephiro!”

134 Nto yaakhala ntoko kaaniwerya omwiiwa Graham Snelling, wala mutthu mmosa, aaiapa esipo ele so. Enniipiwa vaava, Anna Mae ni nyuwo othene.

Wookinkhela owaani kooxanka, ni kintthuna kimoone Yesu.

Kaatthuna kiiwe isiinu iye soosivela sa ntthyawelo sirumaka.

Saammwaleela ephiro aka ni saamulakaseiha woova wothene.

Pwiya, mukihye koone epantte ekina y’ekuwo y’okathi.

Nyuwo muhiiwa wiipiwa okereja va.

135 Vano kaahiiwa Etthu wira, “Mwaatthuna moone-tho epantte ekina y’ekuwo?”

Miyo khwira, “Yaamurowa okikhaliherya vanci-ene.”

136 Nto miyo khuweha. Okathi vakhani paahi, miyo... Emumulelo emosa kaahiphiya Nipuro naamukhaani naari noothetemana. Miyo khuweha ottuli, nto kaari vale, kimmaathale ene voolilini. Nto miyo khwira, “Ela etthu yootikiniha.”

137 Vano, nkaatthuna wira nyuwo mutthikele ela. Ela eri okereja waka, wala ipwittipwitthi saka kinsukih’aka. Vakhala wira, kaari mw’erutthu yeela wala ota, sinto waari okuxiwa, khiyaari ntoko hata yoowoona kitonko aka okhalana. Kaaniwerya oweha Iwe, ni kaaniwerya oweha nno.

138 Nto vaphin’ye aka Nipuro nle naamukhaani, kiira kihinatoko owoona atthu anci-ene orwa etthyawaka, ekhuwelaka, “Oh, munn’ihu oophenteyexa!”

139 Vano miyo khuweha. Nto mwaamuthiyana mmosa, khino mwa miyaakha sawe soophiyaka miloko miili, muloko ni mithanu na miraru wala miloko miili, awo yaamukipatikhasa, ekhuwelasaka, “Munn’ihu oophenteyexa!”

140 Va anoorwa aximiravo, m’owaarya wa olopwana w’emiravo. Nto maitho aya yaamwaarya ni yaakhala ntoko ittheneeri ohiyu wooriipela. Maino aya ootteela ntoko nluku noowaarya. Ni yaanikhuwelasa, ni yaanikipatikha, ni yaanikhuwela, “Oh, munn’ihu oophenteyexa!”

141 Vano miyo khweemela, khuweha. Nto kaari mmiravo. Khuweha ottuli erutthu aka yoowuuluvala yimmaathale ene vale, ni matat’aka waakohi waka. Nto miyo khwira, “Nkinsuwela sana yeela.”

142 Nto aximwali ala ekipatikhasaka. Vano, kinnisuwela wira ola muthukumano wootakanxeya, ni kinihimya ela ni osivela ni ereerelo murima wa Eroho. Khivanweryaneya alopwana waapatikha athiyana khuhikhala otannyeya v’erutthuni ya mutthu; masi Iwe khiyaari-wo eyo. Khiwaari-wo nsana nakhala meelo. Awo khiyaakhulumuwas. Awo yaari... Nkinatoko owoona athiyana ooreerasa siisaale kookhalaru. Awo yaarinasa ikharari soorekama mpakha muyuununi; isaaya soorekama mpakha munawoni mw’aya. Ni awo yaamukipatikhasa paahi. Khiwaari opatikha hata ntoko murokor’aka ene, okilanthi vale, aarow’awe okipatikha. Awo khiyaakipehari, ni miyo nkaapeharisa. Yaari etthu emosa miyo—miyo kihirin’aka e—ehimeryo, nkirina moolumo ene wira kihimye. “Oreera voomalela” khiyaarowa waattamela. “Yo wunnuwexa” khiyaarowa hata waattamela, hata vakhani. Yaari etthu miyo kihinatoko aka... Nyuwo muhaana okhala Weiwe paahi.

143 Nto miyo khuweha epantte *ela*, ni epantte *ele*. Nto awo yaamoorwasa, ikonto ikonto sene. Nto miyo khwira, “Nkinsuwela sana yeela.” Miyo khwira, “Ahe, awo . . .”

144 Nto va khurwa Hope. Awo yaari amwaar’aka oopacerya. Awo khutthimaka, ni khayiirale, “Iy’aka.” Awo yiirale, “Munn’aka oophenteyexa,” nto okathi akipatinkhe aya. Aahikhala muthiyana mukina eemenle vale, aakipatinkhe, ni Hope khumpatikha muthiyan’ola; nto khula mmosa. Nto miyo khuupuwela, “Oh, ela ehaana okhala etthu yoovirikana. Khivanweryaneya okhala . . . Yookhala etthu . . .” Miyo khuupuwela, “Oh, kaamuphiyererya otthuna otthikelatho nikarakasa nle?”

145 Miyo khuwehaweha nto. Miyo khuupuwela, “Exeeni ila?” Nto miyo khuweha, sana. Nto miyo—miyo khwira, “Miyo—miyo nkinwerya osuwela sana yeela.” Masi Hope ooneya okhala ntoko, oh, mulipa-oolattuliwa a nttittimiho. Owo khaari oovirikana, masi ntoko mulipa-oolattuliwa a nttittimiho.

146 Vano kaahiiwa Nsu nimosa nto naalavunle ni miyo, naari okathi, khwira, “Ti yeela nyuwo mulaleny’anyu wira yaari Eroho Yowarya. Ola Mphento woomalela. Ni khiyaavo hat’etthu ekhanle oovolowaka Nno ehirina Yoowo.”

147 Miyo kiri oolikane-ene, kihinatoko aka kookhalaru, wira onthuneya Mphento woomalela oreera, wo ovolowa Iwe. Iwe khiyaakhanle ehace. Khiwaakhanle okhulumuwa. Khiwaakhanle okhwa. Eretta khiyaakhanle, ookela Iwe. Okhwa; khivaaweryaneya—khivaaweryaneya omuuluvaliha mutthu. Nto e . . . Khivaaweryaneya awo wunlasa. Waari ohakalala omosa paahi.

148 “Oh, munna’aka oophenteyexa!” Vano miyo khikuxiwa, khupwehiwa nipuro nimosa nuulupale noottukhuwa.

149 Miyo khuupuwela, “Miyo kahi kinooloha. Kinniweha ottuli e—erutthu aka yimmaathale ene va vooilini.”

150 Nto miyo khupwehiwa osulu iwe. Nto miyo khwira, “Oh, khivaathuneya miyo okilaathi osulu nno.”

151 Nto va khurwa athiyana n’alopwana, ipantte soopiili, mwa othapuluwa w’emiravo aya, ekhuwelasaka. Nto muthiyana mmosa eemenle vaavale, vano owo khikhuwela, “Oh, munn’aka oophenteyexa! Oh, hiyo ninnithapa owoonani Nno.”

Miyo khwira, “Miyo nkinsuwela sana yeela.”

152 Vano nto Nsu nlo naalavula, vasulu vaka, khwira, “Moosuwela, yolempwa mBibiliani wira maprofeta yaathukumanyiwe n’athu aya.”

Nto miyo khwira, “Ayo. Kinnuupuwela eyo mwa Soolempwa.”

Khwira, “Ahe, ela enrowa okhala okathi onrow’anyu othukumana n’athu anyu.”

Miyo khwira, “Vano awo anrowa okhala eekeekhai, ni kinoowerya owaapapela.”

“Oh, ayo.”

¹⁵³ Miyo khwira, “Masi, aakhala imilyawu sene. Khakhanle aBranham anci-ene siisaale.”

¹⁵⁴ Nto Nsu nle khwira, “Awo kahiyo aBranham. Awo t’ale awinyu oorukunxa murima. Awo t’ale muweettihenry’anyu w’Apwiya.” Ni khwira, “Athiyana kamosa-kamosa ale vale, nyuwo munoon’anyu wira khareere oreerasa, yaahivikanasa miyaakha miloko mithanu na mixexe okathi oweettihenry’anyu w’Apwiya. Khivanxankiha awo okhuwelaka, ‘Munn’ihu oophenteyexa!”

¹⁵⁵ Nto awo khikhuwelasa, othene vamosaru, khwira, “Vaakhanle wira khimwaaronwe, hiyo khinaarowa okhala Nno.”

Miyo khuwehaweha. Khuupuwela, “Ahe, nkinsuwela sana ela.”

Miyo khwira, “Oh, ori vai Yesu? Nkinreere otthuna, omoona Yoowo.”

¹⁵⁶ Awo khwira, “Naanaano, Owo ori osuluxa vakhani, epantte yeele *ele* iwe.” Khwira, “Nihiku nlo Owo onimoorweelani. Munnona?” Khwira, “Nyuwo mwaarummwe wira, mukhale muhooli. Ni Muluku onimoorwa. Nto okathi Owo onrw’awe, Owo onimoolamulani ottharihaka ele nyuwo muwiixuttihaly’anyu, toko, sinto awo anookela wala nnari. Hiyo ninrowa okela nittharihaka mwiiixuttiho anyu.”

¹⁵⁷ Miyo khwira, “Oh, kinnitthapa sana. Ankhi Paulo, owo ohaana okhala siisa? Petru ohaana okhala siisa?”

“Ayo.”

¹⁵⁸ Miyo khwira, “Vano miyo kilaleenrye Masu othene awo alaleeryans’aya. Miyo nkinavirikanyiheke Awo, okhuma epantte emosa mpakha ekina. Vatthu awo apatins’aya ni Nsina na Yesu Kristu, ni miyo koopatisa. Vatthu awo yiixuttihaly’aya opatiiso wa Eroho Yowarya, miyo kihixuttiha. Sothene awo yiixuttihaly’aya, miyo kihixuttiha nave.”

¹⁵⁹ Nto athu ale khikhuwela, khwira, “Hiyo noosuwela eyo. Ni noosuwela wira nnoorowa ni nyuwo, nihiku nlo, otthikela elapo ya vathi.” Khwira, “Yesu onimoorwa, vano nyuwo munoophukiwa ettharihiwaka Masu yaawo munilalenry’anyu. Vano nto nyuwo mwakupaliwa-ru okathi ene yoowo, yeeyo enrow’anyu okupaliwa,” ni khwira, “vano nyuwo munoorowa onooniherya Yoowo, ntoko ithuvelo sanyu sa muteko anyu.”

Khwira, “Nyuwo munoorowa onihoola wa Yoowo, nto, vamosa, ninoothikela elapo ya vathi, wira nikhaleke mahiku othene.”

Miyo khwira, “Kihaana otthika vano?”

“Ayo. Masi mutthikele mwiilipihaka.”

¹⁶⁰ Miyo khuweha. Nto kaaniwerya owoona atthu, mpakha vaawery’aka woona-wo, nlelo erwaaka, etthunaka okipatikha, ekhuwelaka, “Munn’ihu oophenteyexa!”

¹⁶¹ Okathi ene yoowo Nsu nimosa khwira, “Sothene muphental’anyu kweekwe, ni sothene soophentaleni kweekwe, Muluku ohoovahani Nno.” Nto miyo khuweha. Nto va onoorwa mwalapwa aka a khalayi, orwaaka. Va enoorwa ekhavalwa aka, khuphiteeriha muru aya vanikhatani vaka, khwaathama vakhani. Khwira, “Sothene muphental’anyu kweekwe, ni sothene soophentaleni kweekwe, Muluku ohoovahani mmatatani mw’anyu, muhina wa muteko anyu.”

Vano miyo khwiisoona kikhumaka Nipuro nle nooreera.

¹⁶² Vano miyo khuwehaweha. Miyo khwira, “Moovenya, oophentiwa?” Awo nlelo yaamurupa.

¹⁶³ Nto miyo khuupuwela, “O Muluku! Oh, mukikhaliherye, O Muluku. Muhikihiye nnakhala wiisakaleliha ni Nuulumo nimosa. Mukihiye kikhale sana vaMasu ale, ni kilaleerye Yaawo. Khenikicala exeeni enrwa wala enrowa, etthu mutthu mukina oniir’awe; aSawuli akavi a . . . aana a Kiixi anikhumelela, kavi *ila, ele*, wala *ekina*. Mukihiye, Pwiya, kiilipihe mpakha Nipuro nle.” Woova wothene w’okhwa . . .

¹⁶⁴ Miyo kinihimya ela, ni Bibilia aka ohoolo waka, voosiis’ula. Kookhalana mwammiravo mmosa vale, a iyaakha xexe, wira oleliwe. Kookhalana mwanamwane mwaamuthiyana a iyaakha thanu na xexe; ni mwaaruusi mmosa, kinixukhuru aka mwaha wa yoowo, otthanre ephiro y’Apwiya. Muluku, mukihiye kikhale, wira kaalele kittharihaka miruku sa Muluku.

¹⁶⁵ Nto ohiya vo, elapo yothene enikhala ntoko okhuwela wa miyo, athiyana n’alopwana a iyaakha miloko mithanu na mixexe, ni a inamuna sothene. “Nyuwo mwahaaronwe, hiyo khinaarowa okhala Nno.”

¹⁶⁶ Nto, Muluku, mukihiye kiilipihe owana ekhotto. Masi okhwa warwa vale, miyo nkihiyo tho. Waamukhala otthapa, waamukhala opuha, okela, okhuma mwa ela enintta ni ehaaya.

¹⁶⁷ Vaakhanle wira kaamuwerya oteka, osulu wu, epulooku yoorakama imiilya ipilyawu emiya, ya ipantte xexe, nto ti siiso ory’aya Mphento woomalela oreera; khula nivalo ephiro ela, nnoophureya, mpakha ophiya vatthu vary’ahu vano. Yaamukhala eruku y’epahuwelo paahi, etthu yeeyo yaamukhaani enwery’ahu okwannya ni waapapela wira yookhala etthu nipuro nlo. Hiyo khanisuwenle exeeni Iyo.

168 Oh, apatthani aka oophenteya, oophentiwa aka, ootthuniwa aka a Ehapari yooreera, an'aka ooyariwa mwa Muluku, mukiiwe miyo, pastore anyu. Nyuwo, kaanithuna ekhanle ene enamuna emosa kaarow'aka owerya woohimeeryani. Khaavo moolumo; nkaarowa owerya ophwanya; khaniphwanyaneya hata nipuro. Masi epantte ekina y'emumulelo ela yookiserya, t'eri etthu yoovuwexa nyuwo etonko anyu. . .Khiyaavo enamuna y'ohimya. Khiyaavo hata enamuna. Nkinwerya tu wira. Masi etthu p'itthu niir'anyu, mpatthani, mukakhe itthu sothene sikina mpakha mphwanye Mphento woomalela. Muphiyerye nipuro muniwery'anyu waaphenta atthu othene, khula nwanani, sothene sikina.

169 Othotola omosa Iwe, wa miyo, wookikhaliha mutthu mukina. Nkikhanle nnakhala, nnakhala, nnakhala ookhala-tho Munna Branham yoole kaary'aka. Hata wira matteeke anoottikinyeya, hata wira overunya onimwaarya; hata wira anamahottela anikithoonyerya kapwitthi. Etthu p'itthu, khenikicala. Kinrowa wiilipiha owana ekhotto, ni mahala a Muluku. Maana, kinnilaleerya Ehapari yooreera wa khula yoopattuxiwa ni khula mutthu onwery'aka, kaatumereryaka Muttetthe ole wooreera epantte ekina.

170 Siiso ekhalaka ntoko yoolipa. Khino sintthuneya ikuru sinciene. Nkisuwenle okathi xeeni tho ohanle. Hiyo khanisuwenle, nilavulaka mw'erutthu. E . . .Mwa owehawehiwa mw'erutthuni mw'aka nihiku nle, owo iirale, "Muhaana iyaakha miloko miili ni mithanu s'ekumi yoolipa, ni yooreera. Muri oolipa." Eyo yaahikikaliherya. Masi, oh, khiyaari yeeyo. Kahi yeeyo. Eyo etthu ekina muhina *mu*. Ela enintta ehaana owara ele ehinintta. Ela enookhwa ehaana owara ehinkhwa.

171 Khino anookhumelela aana a Kiixi. Miyo. . .Itthu sothene sooreera awo aniir'aya, nkirina hat'etthu yoonanara y'ohimya voovirikanya yeeyo, waavaha alipa-oohaawa ni oothoiwa. Nto muupuwele, vano, Samuweli aahimuhimeerya Sawuli, "Nyuwo munoolaleerya nave." Nto anci-ene a axilopwana awo alaleyi aalupale, a ikuru, anwerya olaleya Masu ntoko malaikha maalupale. Masi nnakhala vo khiwaari otthuna wa Muluku. Muluku aari wira okhale mwene aya. Munna mulopwana, muthiyana, muhiye Eroho Yowarya yohooleleni.

Nrowe nuuramihe miru sahu okathi vakhani.

Wookinkhela owaani kooxanka, ni kintthuna
kimoone Yesu,
Kaatthuna kiiwe isiinu iye soosivela sa
ntthyawelo sirumaka;
Saammwaleela ephiro aka ni saamulakaseiha
woova wothene;
Pwiya, munihiye niwehe epantte ekina
y'ekuwo y'okathi.

Pwiya, mukihye kiwehe epantte ekina
 y'ekuwo ya mixankiho ni woova,
 Mukihye koone mukhalelo ole w'okathi wa
 nsuwa noowaarya;
 Waamulipiha waamini wahu ni
 waumulakaseiha woova wothene;
 Pwiya, mwaahiye ewehe epantte ekina
 y'okathi.

¹⁷² Miyo kookupali, Pwiya, vaakhanle wira ekerej'ela yaamukhaani, voosiis'ula, yaamuwerya oweha epantte ekina y'ekuwo! Khiwaarowa okhala hata ovelavele eriyari aya; khiwaarowa okhala-tho. Hata eretta; hat'etthu woohikhala oloka woomalela. Nto Ti emumulelo emosa paahi eri eriyari ya nno ni Iwe, okhuma wuuluvala mpakha emiravo, okhuma okathi mpakha Ohimala; okhuma wooceya wa meelo, ni oxanka wa nsana, mpakha okathi wa vano Woohimala mwa oloka woomalela.

¹⁷³ Miyo kinvekela, Muluku, wira Nyuwo mmureerihe khula mutthu va, yaakhanle ene va, Pwiya, ale ahinoosuwelani mwa ephiro eyo ya Mphento. Ni vekeekhai, Tithi, khiyaavo yaarowa owerya okela Nipuro nle ehirina muthinto yoowo wa Mphento, Oyariwa vasya, okhala ooyariwa vasya. Eroho Yowarya, Muluku, Mphentoo, ni hiyo noosuwela wira eyo ekeekhaii. Hata wira ninlovola miyaako mwaha wo waamini wahu, vakhala wira nihiira itthu suulupale, nlelo, nihirina Yeeyo iwe, khinaarowa hata owerya owela exikatta ele yuulupale iwe. Masi ni Yeeyo, Eyo enoonikuxa ovikana ivelavelelo iya sa vathi. Miyo kinvekela, Tithi, wira Nyuwo mwaareerihe atthu ala va.

¹⁷⁴ Ni, wira, khula mutthu okiiwale, voosiis'ula, ohimya Ekeekhai ila, Nyuwo mukikhalele onamoona, Pwiya, ntoko Samuweli a khalayi; "Kaahinto waaleela etthu p'itthu mwa Nsina Nanyu yaahakhanle y'ekeekhai?" Awo t'ari aphuki. Nto miyo kinnaalela vano, Pwiya, wira Nyuwo mwaahikikuxa mpakha Muttetthe ole. Ni Nyuwo moosuwela wira ekeekhaii.

¹⁷⁵ Nto vano, Tithi, aakhanle ene mmosa ohinoosuwelani, ola okhale p'ukathi awo aniiir'aya, "Pwiya, muhele mwa miyo otthuna w'okhala ntoko otthuna Wanyu." Munivahe, Tithi.

¹⁷⁶ Nto vano, nyuwo, muuraminhe miru sanyu, munnitthuna ovenxa matat'anyu, mwiire, "Mukivekelele, Munna Branham; okhale otthuna wa Muluku mwa miyo."

¹⁷⁷ Vano muryeene vaavo mury'anyu, voomalelelya sana, muhinaalelelani paahi Atithi wira, "Muluku, muhina mwa murim'aka, olelo, miyo kinnikhootta itthu sothene sa molumwenkuni. Kinnikhootta itthu sothene, wira koophentekeni Nyuwo ni woorumeelani Nyuwo, makhalelo aka othene. Ni miyo kinoorowa, okhuma olelo, mpakha ohoolo, woottharani, mwa khula Yoolempwa ya Bibilia Anyu"? Vakhala

wira khamupatisiwe ni opatiiso w'oKristu, "Kinoopatisiwa, Pwiya."

¹⁷⁸ "Vakhala wira nkinatthi waakhela Eroho Yowarya..." Munooowela okathi onaakhel'anyu Yeeyo. Eyo enimoovahani, Eyo enimoovahani olipa ni Mphento ontthun'anyu. Oh, khino siiso mwinre ene etthu yoovirikana, mwaahikhalana iyooneo, ntoko khino murookhuwela wala olavula ilavulelo, yeeyo eri yooreera. Masi Mphento ole wa Muluku waahikhale mmo, mukikupali miyo vano, mwiire, "Pwiya, muhele mmurimani mwaka, ni mmunepani mwaka, ophiyera wa Eroho Anyu, wira kiphenteke, ni nlemeliho, n'ukhalana Mphento ole wa Muluku mmurimani mw'aka, olelo, waarowa okiroiha Muttetthe ole okathi enrow'aya okihiya ephumu aka yookiserya," okathi onvekel'ahu. Nvekele, yeenyu, vano. Enamuna anyu, nvekele, munvekele Muluku owiireleni yeeyo nyuwo.

¹⁷⁹ Miyo kinnoophentani. Miyo kinnoophentani. Nyuwo axilopwana mu oophenteyexa a ikharari soottweelela mukilaanthi va, muhinreere ovara muteko ni waalyiha anamwane axikhaani! Nyuwo aximai, oowooniha othunku munikukutthaka maithori mmaithoni mw'aya! Mukihiye koolipheryeni ila, munna, oophentiwa, kahi siiso epante ele ekina w'emumulelo. Kookupali wira vekeekhai Eyo eri mpaani mu. Owo mukhalelo paahi onikhal'ahu-mo. Ela eyinttelo paahi onikhal'ahu-mo vano.

¹⁸⁰ "Masi muhele mwa miyo, Pwiya, okhala otthuna Wanyu." Nvekele, okathi onvekel'ahu hoothe.

¹⁸¹ Voottittimiha, Pwiya, vasulu va mulipiheryo wa Masu Anyu ni Eroho Anyu Yowarya, hiyo ninnitteeliwa murima osuwelaka vatthu onikhuma Oyariwa wahu. Ninnitteeliwa murima wira hiyo "khaniyariwe n'utthuna wa mutthu, nnakhala otthuna w'erutthu, masi otthuna wa Muluku."

¹⁸² Ni hiyo ninvekela, olelo, Tithi, wira ala anvekela vano mahala anlevelela, wira Eroho Anyu evare muteko ene yoowo, Pwiya. Khiyaavo hata enamuna ya miyo wira; miyo ka mutthu paahi, mwaana mukina a Kiixi. Masi hiyo ninootthunani Nyuwo, Eroho Yowarya.

¹⁸³ Muluku, mukihiye kikhale ntoko Samuweli, ole onihimya Ekeekhai ya Masu. Ni Nyuwo munnilipiherya Awo, mpakha va, ni kinnaamini wira Nyuwo munootthikela, kaakhalakaru oororomeleya wa Nyuwo.

¹⁸⁴ Othene awo vano yaakhele Ekumi Ehinimala, Tithi. Wira nihiku nla niaakhume. Waphiya okathi w'ohiya olumwenk'ula, wira ela, etthu kimanly'aka waahimeerya, ekhale ekeekhai. Nto okathi oniphwanyaney'ahu va, atthu anookhwa, olelo, niwehaka eroroco ahu, nuupuwelaka yoly'ahu y'ohiyu, muteko meelo, ivelavelelo ni miteko sa makhelelo, khasinrowa okhala Nto. Sothene sinrowa omalamala. Khasinrowa okhala ivelavelelo; ni

ohakalala wuulupale wa Ehimalelo. Mwaavahe enamuna yeeyo y'Ekumi, Tithi, khula mmosa. Ni wira . . .

¹⁸⁵ Kinoovekelani ila, Tithi, wira khula mutthu ori va voosiis'ula, okiiwale othariha yoowoona ela, kikumane ni khula mmosa a yaawo epantte ekina; enamwi aryeene axilopwana va yaarowa ohiiraana ni miyo, n'athiyana, nave. Masi, Tithi, muhihiye eyo onikattyamiha. Wira nikumane ni yaawo Iwe, ni wira awo etthimakeke, nave, ni wira nivarane mmosa ni mukhw'awe, nikhuwelaka, "Munn'ihu oophenteyexa." Muhiye ekhale ntoko sooniheriw'aya Iwe, Pwiya, wa athu othene, othene onaaphent'aka, ni othene ale anikiphenta. Kinvekela wira ekhale sissale, Pwiya. Ni miyo kinnaaphenta awo othene. Mwaahiye awo erwe, Tithi. Miyo kinnaavaha Ekumi Ehinimala vano. Wira awo evare mpantte aya, wira ekupali Yeeyo. Vano kinvekela mwa Nsina na Yesu. Amen.

¹⁸⁶ Nirina okathi vakhani paahi, wira naavekelele aretta. Kinoona wira nookhalana mwanamwane mwaamuthiyana, onwereiwa va, ni muhano mmosa vakhaterani.

¹⁸⁷ Vano, w'axinn'aka oophenteyaxa alopwana, n'athiyana, xontte nuhikiwe voovonyeya. Miyo—miyo nkinsuwela etthu yaakhumelenle. Nkinsuwela etthu yaakhumelenle. Masi, Muluku, kakhwa vale, mukihye kitthikele Weiwe. Mukihye paahi kirowe Nipuro nenle, ti weiwe onthun'aka okhala, hata wira waari vai. Nkineeraya okhala ntoko Paulo aakuxiwe mpakha erimu yaneeraru. Nkinihimya yeeyo. Kookupali wira Owo aathuna okivaha ikuru paahi, aathuna okivaha etthu yaamukhaani wira ekiroiheke ohoolo, mwa muteko aka musya onoorwa.

Yaamukhala y'ohittittimiha kaasomme etthu va, minuutu mmosa paahi? Yaamukhala sana? [Muthukumano oniira, "Amen."—Mol.]

¹⁸⁸ Emosa wa irevista soosuwanyeyexa sa mulaponi, Billy Graham. [Munna Branham onimusoma artiiku mmosa, ntoko sintharelan'aya—Mol.]

¹⁸⁹ "Totori Billy Graham Oolattuliwa n'Amaka," nikukhu noopacerya na *The Afrikaans Times*, mahiku 15 a Fevereiro, 1960. Nammulepa artiiku, yoowo aari Musilamu, Mmaka, onuupuwela wira miiriirya saahaana otthara elaleeriwo ya Ehapari yoorera ya Kristu, mmosaru nsana, olelo, ni mahiku othene. "Nnohimya, 'Ti yeela. Kristu ohaalaiherya anamatthara Awe, okathi Owo ohimmy'awe wira, "Ole onikaamini, miteko sinvar'aka owo onoovara nave; hata suulupale ovikana iya owo onoovara." Ekereja yaahinto ovara miteko, seiyo, mi—mikhalelo sa Kristu mBibiliani? Eyo enniwerya ovara olelo? Ookhala mutthu mmosa a mukereja onwerya ohiyaniha, wira opake hata nuusu na miiriirya sipakiwe ni Kristu, kahi wira "miteko suulupale"? Nyuwo munniwerya, ntoko mutthu mmosa,

oohimmwa, oowaakiherya oKristu, waahihimuxa, waahihimuxa ookhwa mwa ekumi y'erutthu? Munniwerya weetta vasulu va iphareya? Munniweya waavoniha aretta ni owooniha alipa-oohoona? Ela kheri, ntoko evonyeryo ehimmwe osulu, yooniheriwe ni Mmaka? Wala yooniheriwe. . . wala eyooniheryo evahiwe ni Kristu. . . ? . . . anamatthara ntoko ohimya w'atthu kamosa-kamosa, wala mwa waamini wanyu? Epannte yuulupale y'artiiku a Mmaka voowooneya enihimya etthu yoovonyeya emosa etthariwaka n'ekina."

¹⁹⁰ Awo annimukhaliha Mmak'ola ohaamineya, masi owo aahikhalana exariya. Masi va t'ile awo yaahimmy'aya. [Munna Branham onimusoma artiiku, ntoko sinttharelan'aya—Mol.]

¹⁹¹ "Waakhula wooreera omusoma Bibilia, ni osuwela Ekuraani. Ekuraani enihimya wira e. . . ni. . . enihimya n'ulikanyiha. Ohimya wira Emaka ti yookumihereyexa ni ennivikana oKristu, voolikane-ene waanyiherya w-o-o-n-y-a-k-u-l-a, woonyakula," wona waka, "Mulipa-oolepa, nnya, oohimya etthu y'ekumi enihimya miiriirya okhala s'Ekereja. Masi va emaara ekina hiyo ninnihoverya onaxariya wa mulipa-oolepa, maana t'ani aarowa owerya ohimya n'uvaanyiha miiriirya saapakiwe ni Reverendu William Branham ohoolo w'Amaka w'Afrika du Sul, okathi atthu ikonto muloko yaamwaakhenly'aya Kristu ntoko Moopoli? Vathi va muteko wa William Branham, oDurban, Afrika du Sul, ni nipuro pi nipuro nikina mulaponi, wala sa T. L. Osborn epante Enikhuma nsuwa wa w'Afrika. Vekeekhai, hiyo ninnimweemererya Billy Graham ipursento emiya. Hiyo noohimya wira mwaha ene w'otthokelela, ti w'ohi. . . Mwah'ola w'otthokelela khorina maana."

¹⁹² Masi varyari va khula etthu yaamukhaani ya yeeyo (awo yaakiihanne wira. . . yiirale hiyo naari anamathipelela, hiyo khinaasuwela etthu niir'ahu) awo yaahaana okhalela onamoono, vaxornaaleni vaya aneene, wira Muluku ohiira eyo, khula enamuna. Muluku ti Muluku sana, olelo, siiso ntoko Owo otonko awe okhala. Khino nyuwo munuupuwela wira awo khanaamini, awo khanoona. Eyo khayiipitihiwe tu; eyo kheniiriwa vanlothoni. Nto atthu ikonto imiya sene akilanthi ene vale, yaahoona eyo. Okathi yaamoonaly'aya mmirav'ole, oorakala ooxanka orwa vale, Eroho Yowarya omutharihela makhalelo awe, n'itthu sikina, ni etthu yiiraneiyee mme. Ni owoona Amaka ikonto muloko wummaathi vathi, oowiisaatalela, omukupali Yesu Kristu ntoko Moopoli aya.

¹⁹³ Hiyo nlelo nookhalana a T. L. Osborn, ni siiso, nlelo anvaha Yolya y'epwittipwitthi. Kinoona wira Munna Osborn nlelo khonakhaleke eriyari y'Amaka. Awo anihimya wira t'oweryaxa. Masi hiyo nlelo nookhalana Muluku onwerya woopola epwittipwitthi wa kharamu, onwerya woopola epwittipwitthi wa ekhaya.

194 Yaahikikhaliha sana osuwela wira yaahaana olepa ni waakhulela. Nnari, awo anuupuwela wira nnari; awo anookhuma n'urukunuwa, ni wira, "Ah, mahiku awo aamala."

195 Mmaka iirale, "Aamala? Weso Bibilia othene oomala. Nyuwo moovonyasa voomalela. Munimukokhorela Mutthu, Mutthu okhwiiye, nto Nsina Nawe naari Yesu. Nto Owo okhwiiye, iyaakha sinci-ene khalayi, ni khiyaavo etthu iyo wira Owo oohihimuwa."

196 Masi awo khiyaaweryasa ohimya yeeyo omuthukumanoni w'oDurban. Iwe Owo aaphwanyaneya airaka etthu emosaru Owo iiraly'awe, ni aahiwooniherya. Vano hata mi—miromolelo sihaana ohokolowa, mutthu ene yoowo aalempe khukilela wira kaahaana ottikiha masu w'omwiixuttiha waka Bibilia, ti yoowo aarina olepa eyo muxoornaaleni mw'aya. Muluku onoowiiriha awo omuttotopela Owo, khula enamuna, nto, vakhanleru siiso. Eyo ekeekhahi. Owo onoowiiriha awo omuttotopela Owo, khula enamuna.

197 Nookhalana mwanamwane mwaamuthiyana, onwereiwa okilanthi va. Ti mwan'inyu? Mulattu awe xeeni, munna? [Munna muthiyana oniira, "Oyeeheya ephome moottooporeni."—Mol.] Sayi? ["Oyeeheya ephome moottooporeni."] Oyeeheya ephome moottooporeni. ["Miyoo kaahoolepelani epaphelo, miyaakha sinci-ene khalayi, mwaha wa oyeeheya wawe ephome moottooporeni."] Oh, ayo. ["Owo onoowereiwa vano, soovira miyaakha mixexe mweeri w'Agosto."] Miyaakha mixexe, Agosto. ["Munna Neville aari wuuwu wira omoone."] Oh, ta oMarengo, wala nipuro nimosa weiwo? ["Paoli."] Paoli. Mwanamwane ene ti yoola, nto? Eri etthu emosa paahi, maama, enwerya omoopola mwanamwan'ola: ti, Muluku omuvoniha. ["Owo ori sana vanci-ene ovikana saary'awe."] Kinnitteeliwa murima mwaha wa yeeyo.

198 Mwaahirowa wu omuvekelela, Munna Neville? [Munna Neville oniira, "Ayo, mulupwana."—Mol.] Okhuma okathi Munna Neville waary'awe wu khunvekelela, owo ookhala sana. Nlelo aakhala amakhampusi anuwela Yolya ya ipwittipwitthi.

199 Mulattu anyu xeeni, munna oophentiwa, mukilanthi vakhaterani vo, yawinyu? [Munna mmosa muthiyana oniira, "Owo orina kankuru."—Mol.] Kankuru.

200 Ahe, kookohani vale etthu emosa paahi, khino vaava vene. Akavi mu avonihawe ka . . . kankuru, nvenxe matata? Nkawehani va, munna. ["Owo vekeekhai khoniiwa, ni khonwerya wiiwa etthu enihimmwa."—Mol.]

201 Muluku t'ori mpenuxa. Hiyo ninnisuwela eyo. Kooleenleniru wira kaamuwerya okhuruwela vo ni okumiha oyeeheya ephome mwa mwanamwan'owo ni omuvoniha, kaamooleelani voovonyeya; wala wira kaamuwerya omukumiha kankuru mwa muthiyana'owo. Masi kinnisuwela etthu emosa, yaahikhala

ekhaya; kankuru, nipotthe, ohoona, hata okhwa, saavanre ipwittipwitthi kamosa-kamosa sa Muluku, nihiku nlo. Vano miyo khurowa ni Owerya wa Muluku, khwiiva eyo khuhokoloxa epwittipwitthi iyo. Eyo ekeekhaii. Ni hiyo nnookhuma olelo, kahi n'itthu emosa yuulupale, *khata khata*. Miyo kinikhuma ni pharancikula mwaamukhaani a nivekelo. Owo onoomuhokoloxa owo.

²⁰² Munnaamini yeeyo, khamunaamini, munna? Ni nyuwo, munnaamini, khamunaamini, munna? Akavi a nyuwo anaamini ni murim'anyu vano? [Muthukumano oniira, "Amen."—Mol.]

²⁰³ Vano muuramihe miru sanyu okathi onrow'aka ovekela. [Munna Branham onihiya mikrofooni vapulpitu ni waavekelela aretta, okathi napiyaano onoop'awe esipo *Waamini Paahi*—Mol.]

²⁰⁴ Tithi ootthuneya, mwali mmosa ooreera omphwanyaneya va, ohinrowa-tho owerya weetta, wala weetakasa, vooikhala wira Nyuwo munoomukhaliherya. Nwanani oroomuvara. Owo ori ottaiwene matothoro ahinwery'aya ophiya-vo. Nwanani oroomutatha khimurihela ottaiwene vanlakani, mpakha tothoro ohinwery'awe wira hat'etthu. Masi owo khokhanle ottaiwene wa ophiyerya Wanyu, Pwiya. Owo ori vaavo vene Nyuwo munwery'anyu ohela ntata Nanyu mwa yoowo. Kittharihaka Masu a Muluku, miyo kinimwiixaatherya matat'aka mwali ula, ni wuulumela oyeeheya nno w'ephome moottooporeni. Mwa Nsina na Yesu Kristu, mmutthikelihe-tho okhala muthiyana oolikana. Owo onoorowa okhala wa ovuwa wa Muluku. Owo akhale mukumi, avolowe ni akhume ekerej'ela, ntoko akina avolonwe, elikanaka ni yeela, omuttotlopele Muluku. Ekhale siiso, mwa Yesu Kristu.

²⁰⁵ Ntoko otteela wa ikharari sawe, iyeettelo vakhani paahi, nto owo onookhala Muttetth'ole iwe weiwo koonaly'aka wira khonuuluvaliwa-tho, masi amiravo. Masi oophentiwa awe arisa vaava, yinlasaka, n'awo annimpenta. Nwanani muulupale oroomuvara khimukumiha vanwery'awe ophiya tothoro, kharamu mmosa oowoopiha a kankuru. Muluku, miyo kinoorwa, omukuxa. Miyo kinoorwa wira kimuhokoloxe. Miyo kinimwiiva kharamu a kankuru, mwa Nsina na Kristu ohinxintteya, yoowo kikhanly'aka namurummwa awe. Wira eyo emuhiye, ni wira okhale mukumi, ni okhale miyaakha sinci-ene, nlelo, wa nttittimiho ni ovuwa wa Muluku, mwa Yesu Kristu Pwiy'ahu.

²⁰⁶ Vano, Tithi a Wirimu, eyo kehiyo ekaruma yuulupale paahi, nnakhala nivaka nookutthiwa, elavulelo ni nuulumo na mulipaoolavula, masi ni pharancikula pure, mwaamukhaani a waamini. Miyo kinirweela munep'ola, n'erutthu ila nwanani a kankuru ovanry'awe orihelaka tothoro vahinwery'awe ophiyerya. Masi miyo kinoomurweela, voosiis'ula, Pwiya, kimuhokoloxeryaka mmalaxini makithi ni a muuttutthi ni maasi ooriiry. Mwa Nsina

na Yesu ooxintta, yoowo kikhany'aka namurummwa Awe. Ni waamini woohithepya, miyo kinnaamini wira onoohokolojiwa, ni owerya nno wa nivekelo nla kiiraly'aka. Ekhale siiso.

207 [Munna Branham onlavulana mutthu, vano khutthikela vamikrofooni wa vapulpitu—Mol.]

208 [Munna Branham onlavula ni Munna Neville—Mol.] Kookupali wira wookhala muteko w'opatiiso. Wookhala? [Munna Neville oniira, "Ayo, mulopwana. Alaleyi aili nlelo aakhalana atthu kamosa-kamosa wira epatisiwe."—Mol.]

209 Munoovenxa muru okathi vakhani paahi? Pastore onoomalaru okileela. . .

210 Atthu ala khanreere, owereiwa sana. Anookhala akumi. Muhi. . .Vaareera. Natiri a Muluku khonavonyeyeke. Hiyo nnimwaarowela.

211 Wookhala muteko w'opatiiso. Aakhala atthu kamosa-kamosa antthuna orowa. Nnoorowa okhalana-tho muteko w'okokhorela ohiy'ula.

212 Ookhala mutthu va ohinrowa owerya orwa olelo ohiyu, muntthuna wira noovekeleleni naanaano, ohinrowa owerya okhala va olelo ohiyu? Murwe nno nto, nyuwo muhinwerya orwa olelo ohiyu. Kinookhalana okathi munci-ene; othata eliinya ya mavekelo, ohiy'ula. Ahaana opatisiwa atthu ala.

213 Murina mwammiravo iwo? Vaareera. [Munna mmosa mulopwana onrowa ohoolo khimuleela Munna Branham, "Vanookhala sana miyo owunnyani ila?"—Mol.] Ayo, munna. Kooxukhuru, vanci-ene. Vannireerela miyo osoma ela nuuvira okathi vakhani wala naanaano va? Kooxukhuru, mulopwana.

214 Vano nyuwo mwanivaharu-tho minuutu mmosa wala miili, nto nnookhalana mu—muteko w'o—w'opatiiso. Koozuwela wira mwaatthuna moone. Nto ale antthuna opatiiso voosiis'ula, ahe, nyuwo, axithiyana erowe *nno* yaware ikuwo sikina, n'alopwana erowe epante *ela*. Vano nto okathi onrow'aka waavekelela atthu ala aretta, vano nyuwo mukhale mwiitthokiheryaka muteko w'opatiiso. Nto ale vano. . .

215 Vano, ohiy'ula, kinoophavela opaka e—eliinya ya mavekelo yaamukhaani, ohiy'ula, naanaanoru, emalakaruru ophiya. Ni ninrowa opacerya Eliivuru yoopacerya y'aEfeso, ohiy'ula. Ni nnoorowa otteeliwa murima vanci-ene vano nyuwo okhala ni hiyo, mwaahikhalane ekereja y'orowa-wo. Masi mwakhalana pastore anyu ni ekereja, vano nyuwo—nyuwo mweetteke okereja wanyu yooreerexa weiwo onkhalihery'anyu.

216 Nyuwo murina y'orowa, ni munrowa okhuma naanaano, Muluku ooreeriheni. Mukhale ni hiyo emaara ekina mwawerya vale. Nnoothapela owaakhelani.

217 Ni nyuwo mumphavela ovekeleliwa, nave, munna? Mulattu anyu xeeni? Ikuru s'ephume.

218 Vano, nyuwo akina, muuramihaka muru anyu, minuutu mmosa, nintthuna ovekela.

219 Tithi, miyo kinnooxukhuruni Nyuwo, olelo, mwaha wa pharancikula mwaamukhaani a makhampusi, nivekelo nimuxinttale kharamu, vano epwittipwitthi yaamukhaani khikumihwiwa mwa yoowo, nto khuhokoloxeriwa wa amey'aya ni tithi aya. Miyo kininkekelela munn'ihu. Kinvekela wira Nyuwo mmuruuhe mukumi, nave, Pwiya. Ikuru s'ephome ni mikattyamiho s'erutthu awe simale. Miyo kinoomurowela, Pwiya, kimuhokoloxe, mwa Nsina na Yesu Kristu. Ekhale siiso. Amen.

Muluku ooreeriheni, munna.

Keettaka, kinniwoonani mmuvarenle ene, mwammiravo mmosa oohona.

220 Etthu emosa ekina kaatthun'aka ohimya. Miyo kaakhalana . . . oowereiwa sana, aamurapheya. Nto kuupuwela . . . nkinthuna wira muhaleele ela, mwawerya vale. Miyo kuupuwela, "Muluku, kaarowa ovaha exeeni kaamwiiwale mutthu weemela vate? Amwaar'aka yiirale-ru, 'Billy, ookhala mulopwana mutokweene va orwiiye owoonani.'

221 "Nto va onarwa mulopwana mmosa oohivaala, a ntari n'ireru soottweelela owiitho wawe. Owo onavolowa, khwira, 'Nyuwo mwa Munna Branham?'

"Miyo kaamwiira, 'Ayo, mulopwana, ka yoowo.'

222 "'Nsina naka ka Simoni.' Khukipweherya ntata nawe, khukiweha minuutu mmosa. Khwira, 'Nyuwo mwa mulipa-oowaamini, Munna Branham.'

"Ayo.'

223 "'Sothene sinookhala sana.' Simoni Petru, a mBibiliyani. Moota kaarow'aka oxukhurela yeeyo! Owo khaarowa olavula vanci-ene. Okipweherya ntata nawe paahi. Sothene saamukhala sana."

224 Vano nto ele enikiphiyerya miyo, ni mukhaliheryo wa Muluku, ni ni mahala a Muluku, aakhala atthu ikonto miloko sene yaarowa waamini etthu ene yeeyo emosaru, kaaronwe-ru wa yaawo. Nto miyo khuupuwela, "Pwiya, mukihye kaaphwanye othene ale onwery'aka, nto. Mukihye paahi-paahi . . ."

225 Miyo khuupuwela, "Vaakhanle wira Simoni, wala Paulo paahi, amosa-amosa a yaawo, yaamoorwa khwira, 'Nyuwo mwa Munna Branham?'

"Ayo.'

226 "Yaakihepwehenrye matata, khukiweha, khwira, 'Vaareera, Munna Branham,' khurowa paahi.

227 “Kaamukhala sana. Kaamukhala sana. Vekeekhai. Miyo kaamwiira . . . Wulu, ominyala waka waamuncerereya naanaano vaavo. Kaamwiira, ‘Kinoorowa okhala sana.’” Ayo, mulopwana.

228 Ni aakhala atthu anaamini etthu yeeyo olelo. Nto ti yeeyo kikhuruwenly’aka va wira kiire, owiixatheryani matata, onvekela Muluku.

229 [Munna Branham onihiya mikrofooni sa vapulpitu ni waavekelela aretta—Mol.]

230 Kintthuna kimwaattamele mwammirav’ola, munna, minuutu mmosa paahi. Owo mwammiravo, ohinoona. Woovira okathi xeeni ory’ene oochoona? [Munna mmosa muthiyana oniira, “Ooyariwaru.”—Mol.] Ooyariwaru. Sayi, mwammiravo! Oh, nyuwo mwa mwammiravo, ooreera sana. [Munna Branham onlavula ni mutthu.]

231 O Tithi ooreera murima! Voohiphiyerya wa matothoro, vooyariwani wa mwammirav’ola, oyariwe ene oochoona, vano khonwerya woona; mwammirav’ola, ooreera ni oophenteya. Vano nwanani, mwaamukhaani ula ohinatthi okhalana ereerelo mwa makhalelo, oroomutatha khimurihela vahimphiyery’awe tothoro. Tivo, kinoomurowela, voosiis’ula, Pwiya. Pharancikula ola ookhweya, mwaamukhaani a nivekelo. Mukihiye kimuhokoloxe, Muluku. Miyo kinimurowela nwanani, xetwani, mwa Nsina na Yesu Kristu, ni kinveka ottikiheriwa mmirav’ola wa Muluku. Kinvekela ottikiheriwa woona wawe, wa Muluku, ohokoloxeriwaka ele Satana emwiienry’awe. Wira aakhele. Mwa Nsina na Yesu Kristu, enookhala. Miyo koolavula.

232 Vano, munna, oophentiwa, vano muhiverye hata vakhani, mwammirav’ola onoorowa okhala sana. Kintthuna wira mmuhokoloxerye weno okereja, ni nwoonihe atthu, wira onniwerya woona. Mmuvahe woona wawe, mwa Nsina na Yesu Kristu.

[Munna Branham onlavula ni mutthu—Mol.]

233 Pwiya Yesu, wiixaathi . . . Mwaamukhaani ula nihinreerek’ahu ovahererya mavekelo mwaha wa yoola! Masi, voosiis’ula, miyo kinoorwa-tho mwa Nsina na Yesu Kristu, kimukunxe-ene pharancikula ola mwaamukhaani Nyuwo mukivanh’anyu. Ni Nyuwo mookikhaliheriya ni yoola, Pwiya, ni Owerya Wanyu, wira kikumihe . . . mwaano mwa kankuru, mwaano mwa okhwa wene, waahihimuxa ookhwa amanle-ene ohimmwa wira ahookhwa, ni ary’ene oolipa ni ooriirya. Miyo kinimurweela nwanani ula, mwa Nsina na Yesu Kristu. Vano mmuhokoloxerye-tho ekumi yooreera, Pwiya. Munivahe. Siiso yiiriwe, wa ovuwa wa Muluku.

234 Ni nyuwo muntthuna ovekeleliwa? [Munna mmosa muthiyana onlavula ni Munna Branham—Mol.] Mwa mulipa-oowaamini? [“Ayo! . . . ? . . .”] Pwiya, miyo kimmuruuha,

voophiyerya wa pharancikula ola mwaamukhaani. Mwa Nsina na Yesu Kristu, etthu ila emukhume ni ehikhalakhale etthikaka.

²³⁵ [Munna mmosa muthiyana onlavula ni Munna Branham—Mol.] Ahe, pharancikula yoowo mwaamukhaani, aaronwe khimuruuha Munna Harley, ni wa mwan'inyu ni yeenyu.

²³⁶ Vano, Tithi a Wirimu, miyo kinimurowela nwanani, kimurumeelaka pharancikula ola mwaamukhaani Nyuwo mukivahaly'anyu, maana Nyuwo muhimmye wira, “Mwaakhaliharu atthu waamini, ni okhala naxariya mwaavekelaka,” nluku nle naamukhaani nnoorowa mpakha vaniiv'aya. Nirowe vano, Pwiya, vano miyo kinveleliherya yoovekela awe. Mwa Nsina na Yesu Kristu, ekhale siiso. Amen.

[Munn'owo oniira, “Nto kinnoona sana ene ikatha saka.”—Mol.]

²³⁷ [Munna mmosa muthiyana onlavula ni Munna Branham—Mol.] Vaareera, munna. Vano hiyo nri. . . Enanareliwo yoovikana ophiyerya wa tothoro. Awo anoowerya woovahani etthu wira yoomaaliheni, masi eyo enimootepihani, nuumala. Ayo. Vano nkawehani. Hiyo ninrowa ottuli wa yeeyo, voosis'ula. Nikhumaka; wira noohokoloxeni. [Nipuro vahiitthu mufiitani.]

²³⁸ Pwiya Yesu, . . . [Nipuro vahiitthu mufiitani—Mol.] . . . maluku mathanu makhaani, w-a-a-m-i-n-i, [f-a-i-t-h nntaava n'Enkelasi—Mot.] ni pharancikula a mavekelo. Nto kinimuhokoloxa munn'aka kimukumihaka mmakwarikhwani wa enanareliwo eyo. . . ? . . . iwo. Miyo kinimuhokoloxerya murettele ni malaxi makithi ni maasi ooriirya. Miyo kiniira yeela mwa Nsina na Yesu Kristu. Amen.

[Munna mmosa muthiyana onlavula ni Munna Branham—Mol.]

²³⁹ Muluku Tithi, mwanamwan'ola mwaamuthiyana, hiyo nootteeliwa murima mwaha w'ohikhala orakala wa mutika. Masi enakhaleru etthu p'itthu, nlelo eri w'ophiyerya Wanyu, Pwiya. Ni kinoorwa ni pharancikula mwaamukhaani a waamini, ni nluku nla. Vano kinriha nluku nla ni ikuru sothene sinwery'aka oriha-no. Mwa Nsina na Yesu Kristu, nilukame nipuro nene. Wira munn'ihu akhale mukumi. Miyo kiniira ela mwa Nsina na Yesu Kristu.

[Munna mmosa muthiyana onlavula ni Munna Branham—Mol.]

²⁴⁰ Ntoko mai ula mwamuthiyana, ni osuulu awe mwaamukhaani, mwaamukhaani ula owo ontthun'awe okumanano epantte ele iwe, epantte ekina, Mutteeth'ole woovuwa kimanly'aka ohimya. Nto awo. . . Mai ula khonrowa okhala wira. . . omulele mwanamwan'ola, ni hata mwaamukhaani khonrowa okhala okathi munci-ene woohikhala ni mukhaliheryo Anyu. Masi miyo kinoorwa ni pharancikula,

ni ikuru sothene ni onina onwery'aka omuhelela nwanani. Ni mwa Nsina na Yesu Kristu, miyo kinnimurihelela yeela. Awo anookhalasa akumi, wa ovuwa wa Muluku. Mwa Nsina na Yesu. Amen.

[Munna mmosa muthiyana onlavula ni Munna Branham—Mol.]

²⁴¹ Oh, ti yooreera sana. Kinnitthapa. Ahe, muteko ole, nto, waari muteko muulupalexa waathoonerya atthu wira ekhume. Owo waathoonerya miteko...?...

²⁴² Tith'ihu a Wirimu, Satana oomutatha mai ula mwaamukhaani khimurihela ovikana ophiyerya wa matothoro ottaiwene. Awo anwerya ohelela murette paahi epantte ele, Pwiya, onrowa omuruuhela naaryuuru paahi, naaryuuru, omurikelaka osuwela vary'awe. Vano nto owo atthikela wiisuwela, onikhala ootepa. Masi miyo kinoorwa ni pharancikula ola a waamini, ni nluku, kiluluwanyaka, wira kilukame yooluluwanyanya. Mwa Nsina na Yesu Kristu, miyo kinnikumaha enanareliwo ela mwa yoowo, wa ovuwa wa Muluku. Amen.

[Ookhala onlavula ni Munna Branham—Mol.]

²⁴³ Muluku ootthuneya, Munna George ommaathale iwe, akhwaaka, woohikhala khalayi. Miyo kihoona etthu waamini omwiirinh'aya. Vano owo orina mwaamukokho, Pwiya. Hiyo ninnisuwela wira vaamuweryaneya ovahiwa kortisoono, etthu yaarowa ovukula vakhaani owereya, masi eyo khenrowa okumiha etthu ene. Tivo hiyo ninluluwany'ahu ni mavekelo ala, mwa Nsina na Yesu Kristu. Wira mwaamukokho arowe. Wira owo arowe owaani ni akhale mukumi.


Kooxukhuru, munna.

²⁴⁴ Ehaali anyu, oophentiwa? [Munna mmosa muthiyana onlavula ni Munna Branham—Mol.] Oh, wulu! Yoohiiwiha. Munniwerya wiiwa sana? Uh-huh. Vakhani paahi ovikana vamphiyery'aya atthu ankhwa! Nyuwo mwa mulipaoomwaamini Pwiya Yesu? [Munna muthiyana oniira, "Amen."] Miyo kinnimoona muthiyana mmosa ooreera Iwe, nihiku nlo nimosa. Munookhala-tho mwali mahiku othene. Koozuwela wira muntthuna mukhale mukumi vano wa ovuwa Wawe. Mutthikelaka e... .

²⁴⁵ [Munna muthiyana oniira, "Nnari, kinimuxankela mwan'aka."—Mol.] Mwan'inyu. ["Oronwe soovira miyaakha miili."] Khamunwerya omuphwanya? ["Ori mmatatani mwa Muluku."] Oh, owo—owo orimookhwa? ["Uh-huh. Vekhatoni mwa okhwa."] Oh, yeeyo. ["Ni oripiwa waka murima."] Oriipiwa murima mwaha w'opweteiwa. Ayo. ["Kooriipiwa murima... Kooriipiwa murima mwaha w'opweteiwa. Ni kinoona ntoko, wakhala otthuna wa Muluku, kaatthuna wira Owo akikuxe. Khakhanle maxakha mwa Yoowo."]

²⁴⁶ Munna, oophentiwa, kintthuna wira muphiyerye otteeliwa murima. Owo ohiwa yoowoona, voosiis'ula? [Munna mukina muthiyana oniira, "Owo onniwerya wiiwa sana."—Mol.] Ahe, mmuleele.

²⁴⁷ Ahe, owo onoorowa wooleelani etthu yiiraneiyeye. Emalakarū ephumu anyu nno, mmirav'ole ooreera onimoolipelelani. Munoorowa okhala musya ntoko yoowo. Mphenteke, mphenteke paahi e . . . [Munna oniira, "Nkinthuna ohala. Kintthuna orowa wa yoowo, vakhala otthuna wa Muluku."—Mol.]

²⁴⁸ Tithi a Wirimu Ootthuneya, weetta w'ekumi woophiya okhomoni. Khenihala-tho yoowaatta. Ni mwan'awe oophenteyexa, epantte ekina ya muro, vaakhanle wira owo aaniwerya paahi oweha ottuli, owo aamwiira, "Mahiku vakhani paahi." Awo anlipelela ekalawa, Pwiya, enrowa waaviriha mmahitteteni, mpakha Muttetth'ole woovuwa. Mmureerihe, Tithi, ni muhakalalihe murim'awe. Ni okhale muthukumano muulupale, emalakarū olapuwa muro. 

MWENE OOKHOOTTIWA EMK60-0515M
(The Rejected King)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku vaasiisu, mahiku yettata 15 mweri wa Maio, 1960, oBranham Tabernacle oJeffersonville, Indiana, w'Amerika, okuxiwe wookaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org